


事文類聚

| | |
|------|-----------|
| 内閣文庫 | |
| 番號 | 漢 6126 |
| 冊數 | 61 (51) |
| 函號 | 365 31 |



綴じ部(喉部分)の文字など開きが不鮮明な箇所あり

45
2
99

專文類聚新集

| | | | |
|-------------|-------------|--------|-------------|
| 東京圖書館 | | | |
| 一 〇 冊 | 二 〇 號 | 別 函 | 類 書 類 |
| | | | 漢書門 |

廿六之七

十七

不許帶出



新編

古今事文類聚卷之二十六

新集

諸寺部

諸寺部

南海富大用時可編

淺草文庫

太常寺

歷代沿革

太常寺古之秩宗周曰宗伯秦曰

奉常漢初曰太常惠帝更仍秦舊

景帝中六年復為太常其屬官有太樂太祝

太宰太史太卜太醫均官都水諸廟寢園令

長丞有靡太宰太祝五時各一尉博士皆屬

馬後漢省太宰均官都水廳太祝五時各一
尉凡十官魏建初更仍秦舊黃初元年復爲
太常晉增置協律校尉梁加寺字文置總章
校尉北齊置卿少卿各一人其屬有博士協
律郎八書博士等員統諸陵太廟太樂衣冠
鼓吹太祝太史太醫廩犧太宰等署隋高祖
因之置博士四人協律郎二人奉禮郎十六
人統諸署煬帝罷太祝署唐太常寺卿一人
少卿二人龍朔元年改曰奉常寺咸亨元年
復舊武后光宅元年又改曰司禮寺神龍元
年復舊凡藏大饗之器服有天府御衣樂懸
神厨四院宋初太常寺皆以禁林之長主判
而禮院自有判院同判院祥符中別建禮儀
院輔臣主判而兩制爲知院天禧末罷知院
天聖中省禮儀院康定元年置判寺同判寺
並兼禮儀事元豐正名始專其職焉元祐詔
太常寺置長貳中興併省寺監獨存太常又
命太常兼宗正紹興復隆興元年詔光祿寺
併歸太常寺兼領丞一員罷大元太常寺掌
禮樂郊廟社稷之事有卿少卿丞博士太祝

奉禮郎協律郎等官兼領太廟郊社諸陵太樂四署

羣書要語

容臺類要禮寺唐志禮院杜牧之
行杜濛制 太常王者旌旂也畫日月有大事則建以行禮官奉持之故曰奉常

後改爲太常尊大之義也漢書師古注太常在

六曹尚書之下與尚書丞郎同幕次謂之尚書裏行職略太常實禮樂之司劉夢得集居九寺

之先冠九列之首六帖唐虞歷三代以宗官典國之禮漢之太常是也周禮春官注漢制總羣

臣而聽曰省分務而專治曰寺太常藏天子之旂常職林

古今事實

唐有四院

唐制藏太享之祭服有四院一曰天府院藏瑞應及伐國所藏之寶禘祫則陳于闕庭二曰御衣院藏天子祭服三曰樂懸院藏六樂之器四曰神厨院藏御廩及諸器

宋名三班

太常寺舊在興國坊今三班院是也春明退朝

尚書裏行

崔日知遷太常以歷年久每朝士參集常與尚書同列時人號為尚書裏行唐書又宋朝太常在六曹尚書之下與尚書丞郎同幕次謂之尚書裏行李昉談錄

禁林主判

太常寺宋國初以來皆禁林之長主判而禮院自有判院同判院

禮樂之司

太常寔禮樂之司非儒者勿履劉禹錫傳

聲樂之司

本寺禮儀聲樂之司官屬亦妙選才也兩京記

太常卿

歷代沿革

舜命伯夷作秩宗夔典樂周春官太宗伯掌天神地示人鬼之祀即太常卿之任也秦曰奉常掌宗廟禮儀漢初改曰太常以列侯忠孝敬謹者居之秩中二千石武帝建元元年制太常職典天地兼掌

宗廟後漢太常卿一人掌凡祭祀先奏其
禮儀及行事贊天子以社稷郊時事重職
尊在九卿之首魏晉宋齊皆置梁天監七
年象四時置十二卿太常宗正司農為春
卿後魏太常與光祿勳衛尉為三上卿位
從一品下北齊太常為寺置卿一人隋因
之唐太常卿一人正三品龍朔二年卿曰
正卿宋元祐官品令太常卿正四品大元
仍古制太常寺置卿一人以少卿丞等官
為之貳

羣書要語

宗官周禮春官注上卿蜀耆舊傳
九卿之首漢官解詁常臣司宗揚

雄太常箴

大宗伯凡祀大神祭大示而卜日宿

詔大號治其大禮詔相王之禮若王不與祭

則攝位周禮大宗伯掌六樂同上翼翼太常實

為宗伯崔駰箴太常總禮樂之政兼伯夷后夔

之事樂城趙君錫制陪尚省之衣冠厠容臺之

禮樂太平公主表太常不是卿秘書不是監以

其職品清重非他卿監比也李昉談錄太常卿

位任特隆學冠儒林藝通禮樂者可以居之職

員令

詩句

寵新卿典禮會盛客徵文

白居易賀王侍

郎新拜太常

正名推五字貴仕仰三珪

權德輿

酬太常閣老遷官

平生秉周禮投老奉龍旂

文潛除奉常有感

古今事實

始起朝儀

前漢叔孫通為博士羣臣飲酒爭功或拔劍擊柱叔孫通說上曰願採古禮與秦儀雜就之於是遣使徵魯諸生三十餘人及上左右為學者

與其弟子百餘人為綿蕪野外習之月餘會長樂宮成諸侯皆朝謁者引以次入殿門自諸侯王以下莫不震恐肅敬無敢譁失禮者高帝曰吾乃今日知為皇帝之貴拜通為奉常賜金五百斤

稍定儀法

漢惠帝即位乃徙叔孫通為奉常定宗廟儀法及稍定漢諸儀法皆通所論著

不畏強禦

張渙字然明拜太常立節可否之間強禦不敢

奪也該覽羣籍古今詳備續漢書

不事權貴

杜業有才能遷太常數言得失不事權貴

難經伉伉

劉愷論議常引正大義諸儒為之語曰難經伉

伉劉太常後漢書

德行堂堂

邢顥字子昂時人稱德行堂堂邢子昂文帝以

為太常魏志

子傳父業

巨榮子郁傳父業亦為太常初榮授朱普學四

十萬言多浮辭省定為十二萬言由是有巨榮

君大小章句後漢傳

親導母輿

崔邠字處仁為太常卿初上大閱四部樂都人

縱觀邠自私第去帽親導母輿都人榮之唐本傳

不諧為妻

周澤為太常清齋遇疾妻憐其老闕內問之澤

大怒以為干齋送詣獄吏爭之不聽語曰居世

不諧為太常妻一日不齋醉如泥

先入見母

北齊趙彥深拜卿不脫朝服先入見母跪陳幼
小孤露蒙訓得至於此

北史

對中華殿

令狐德棻為卿高宗坐中華殿問王霸孰先德
棻對以任德任刑為政以清心簡事為本帝悅
厚賜之

唐書

起望省樓

崔曰知恨不居八座為太常卿起樓與尚書省

相對人謂之崔公望省樓

國史纂異

還第攝事

晉太常王寶啓府舍窄狹不足移家母鐘年高
違離靡寧乞還第攝事詔從之

臨軒作樂

蔡謨拜太常咸康四年臨軒謨奏臨軒宜有金
石顯宗納焉臨軒作樂自此始

晉書

改按樂童

王涯字廣津文宗時拜太常以樂府之音鄭衛
太甚欲聞古樂命涯詢於舊工取開元雅樂選

樂童按之名曰雲韶樂樂成獻於梨園亭上悅

振起廢禮

唐元載秉政踈忌揚縮奏為祭酒天下清議益歸於縮乃遷縮為太常充禮儀使以郊廟禮久廢縮振起之

清貧守分

和洽為太常清貧守分至賣田宅以自給明帝加賜穀帛魏史

風流繼軌

宗卿清重歷選所難漢晉已降莫非素範辭爵

則亘郁張奮讓對則丁鴻劉愷潘尼父之文雅純深華表之從容退嘿自此迄茲風流繼軌以

臣况之曾無等級梁陸倕代表

驅千乘車

魏王朗遷太常行陵赤車千乘又唐太常表西

京置一十二列首冠金吾東漢有三十九人多

遷玉鉉戴玄冕之七旒驅赤車之千乘初學記

設九部樂

封教為太常卿故事太常始視事庭設九部樂

東面九賓

栢榮為太常上幸太常府榮東面而坐設九賓

後為五更祿終厥身

東觀漢記

御衣一龍衣

後漢楊賜拜太常詔賜御衣一龍衣

絳服佩玉

魏晉太常卿皆銀章青綬進賢兩梁冠絳朝服佩水蒼玉

布被瓦器

趙典為太常雖處上卿而布被瓦器

者舊傳

類禮十篇

魏鄭公嘗以小戴禮綜彙不倫更作類禮一十篇帝美其書

脩禮百卷

宋治平脩禮書成百卷名曰太常因革禮初歐陽脩同判太常寺奏禮院文字散失請差官編脩嘉祐張洞奏用姚闢蘇洵編纂至是成書

略

職

奏漢安典禮

范鎮傳英宗即位中書奏請遵漢安詔令禮官檢詳典禮以聞鎮時判太常寺上言漢宣帝於

昭帝為孫光武於平帝為祖則其父容可稱皇
考然議者尤非之今陛下既考仁宗又考漢安
懿王則其失非特漢宣光武之比矣

言行錄

議温成廟制

韓維知太常禮院先是温成皇后立廟用樂公
上疏乞詔有司議廟制有不如禮者一切裁去
以明陛下不私後宮之意

誤行黃道

陳彭年於禮文尤所詳練常攝太常卿誤行黃
道上有司止之彭年正色回顧曰自有典故禮

曹素畏其該洽不復詰問

筆談

感諷兩宮

劉敞判太常寺兼禮儀事上初即位有疾皇太
后臨朝疾愈乃歸政適有小人言二宮不歡諫
者或訐而過直公謂當以義理感諷兩宮時進
讀史記至堯授舜以天下公因諫說舜至側微
堯禪以位非有他道惟其孝友之德光于上下
上知其諷諫也慈壽聞之亦大喜

言行錄

獻璇宮圖

宋朝太常寺音律官田琮以上所增九絃琴五

絃阮並協律以旋宮相生之法畫爲圖以獻上善之

論講官坐

劉攽熙寧初知太常禮院會建言講官願得坐講下太常議攽曰侍臣侍天子應對顧問日討論不可安坐自若避席立語乃古今常禮時議者不一卒如攽言

東都事略

儒怯改除

趙宗儒爲卿太常有師子樂非會期不作幼君荒誕教坊牒取宗儒不敢違以狀白宰相宰相以爲事在有司執守合不闕白以宗儒儒怯不任事改太子少卿

唐書

祠禱見寵

王與專以詞解中帝意有所禳祓大抵類巫覡肅宗立遷太常卿又以祠禱見寵

古今文集

雜著

謝再除太常卿充禮儀使表

高郢

累歲守藩每馳心於魏闕一朝聞命得備位於

周行上慙叨忝之深下尉違離之思臣某
臣聞秩宗之任典司三禮奉常之選班列九卿
前古已來用人為重非有望實不宜謬居臣昔
叨此官已為負乘之懼今復再歷信增濡翼之
憂况專職禮儀別蒙委遇明時大禮方奉郊禋
末學謏聞何徵損益飲冰斯切候駕靡遑螻蟻
之微無階報國犬馬之戀但喜歸朝

謝除太常卿表

權德輿

統和神人典司禮樂臣實庸菲謬叨寵榮臣某
中謝臣以書生凡輩懦薄無堪生遇昌期累膺

爵秩四掌誥命五居列曹遂叨禮卿乃佩相印
竟無微效上答皇明自罷宰司再復宗伯旋忝
保釐之任屬當憂寄之時淮甸多虞周郊接壤
上勞聖慮下輯戎師臣不敢愛身不敢避事頻
抗手疏備陳物宜猶披肺肝莫識忌諱自承詔
旨許募新軍實使懦夫增氣輒思仁者有勇繕
修器甲招集驍雄每竭一心敢有貳事陛下憂
臣不逮全度特深出於殊私遽降新命沐浴皇
澤從容大僚量力無庸庇身何幸況太常者伯
夷叔孫通之職臣豈其人五六年間再居此地

感恩知懼循分難任

監祭使廳記

柳宗元

禮檀弓曰祭禮與其敬不足而禮有餘也不若禮不足而敬有餘也是必禮與敬皆足而後祭之義行焉周禮祭僕視祭祀有司百官之戒具誅其不敬者漢以侍御史監祠唐開元禮凡大祠若干中祠若干咸以御史監祠祠官有不如儀者以聞其刻印移書則曰監祭使寶應中尤異其禮更號祠祭使俄復其初又凡制供祠之吏雖當齋戒得以秩罰由是禮與敬無不足者

府史胥徒凡一千三百餘其間上中下瞽至二百人眡瞭又三百人而舞者衆寡尚無數抑何其備也孔子之時禮樂已闕其觀於周而歷聘諸國志固在於行道未始不切切於二者故問於老聃問於萇弘止於論語一書求之執禮固所雅言而言樂爲尤衆至聞韶而不知肉味且曰不圖爲樂之至於斯也所感深矣與人歌而善必使反之而後和之說者或不知此章之意蓋鄉人邦國所用之外樂歌多失其聲苟聞歌而善必使再歌之所謂和之者又得此一詩之

聲矣太史公知之言三百五篇孔子皆弦歌之
以求合韶武雅頌之音禮樂自此可得而述故
曰吾自衛反魯然後樂正雅頌各得其所豈苟
云乎哉自大師摯適齊至少師陽擊磬襄入於
海亦多不得其說摯而下皆樂工散之四方夫
子謹志之如有欲用則皆知其所之殆所謂樂
失求諸夷者邪安上治民莫善於禮夫人而能
知之至於移風易俗莫善於樂烏可不求其故
哉今又幾二千年禮既多廢樂尤失之皇朝累
聖非不講明所謂禮者尚可求之簡冊一時鉅
公論樂甚盛卒不可以復古蓋其本亡矣樂之
本在聲無知之者而力求於尺度秬黍之末爲
可歎也近世陳氏兄弟禮樂二書流傳於世禮
尚可考樂亦名與器而已耳 高宗嗣歷庶事
草創而卿列不以一日廢迨駐蹕錢塘以法惠
僧寺東偏隙地爲勅令所又街之東則爲容臺
尚不足以盡設禮樂之器遇閱習則列宮架於
法惠寺中紹興三十一年少卿王公普始請易
地會勅局中廢遂遷焉中爲寅清堂耽耽夏屋
於是爲稱法惠既廢爲懷遠驛又以爲臺諫官

舍敕局再建於寺之舊處而容臺不移於今五十年矣梁棟墮圯日有覆壓之虞卿少父闕嘉定二年崇慶張君鈞爲主簿已歎其不可居既丞冑監又轉而丞於此時司農大府俱舍舊以趨新或謂亦可遷矣君曰此禮聖人之於祭祀非必神之也蓋亦附之教焉事於天地示有尊也不肅則無以教敬事於宗廟示廣孝也不肅則無以教愛事於有功烈者示報德也不肅則無以勸善凡肅之道自法制始奉法守制由御史出者也故將有事焉則祠部上其日吏部上其官奉制書以來告然後領于有司以謹百事太常脩其禮光祿合其物百工之役先一日咸至于祠而考閱焉御史會公卿有司執簡而臨之故具粢盛牲牢酒醴菜果之饌必實于庖厨鐘鼓笙竿琴瑟夏擊之樂篳蕤綴兆之數必具于庭內樽彝壘洗俎豆醎罍之器必潔于壇堂之上奉奠之士贊禮之童樂工舞師洎執役而衛者咸引數其實設箠扑于堂下以脩官刑而羣吏莫敢不備物羅奏積于几上以嚴天憲而衆官莫敢不盡誠而祭之日先升立於西階之

上以待卒事其禮之周旋樂之節奏必周知之退而視其燔燎瘞埋終之以敬也居常則飭四方祀貢之物以時登于王府服器之脩具祠宇之繕理牛羊毛滌之節三宮御廩之實畢備而聽命焉舊以監察御史之長居是職貞元十九年十二月御史多闕餘班在三人之下進而領焉明年中山劉禹錫始復舊制由禮與敬以臨其人而官事益理制令有不宜于時者必復而上革而正之於是始為記求於簿書得為是職者若干人書焉

重修太常寺記

樓鑰

禮樂一也舜命伯夷作秩宗典朕三禮曰夙夜惟寅直哉惟清無他言也命夔典樂教胄子而及詩言志歌永言聲依永律和聲八音克諧無相奪倫夔亦曰於予擊石拊石百獸率舞又曰曼擊鳴球以至鳥獸蹢躅簫韶九成鳳凰來儀何樂之詳也三禮之書樂亦在焉而名書皆以禮春秋掌邦禮而大司樂以下屬焉則夷夔之任已歸于一矣為樂設官十餘自中大夫而下樂之司庭宇宏敞位置崇嚴不應輕弃矧盜泉

勝母古人所避不若因而增葺之請于朝度材於天邑凡而叢費取其貲而親出納之都下之煩未吏曹之謾欺一切痛革之手賦工直察其勤惰惰者至執扑以扶勤者或釀酒以勞百堵皆興衆役競勸始於三年之仲冬明年三月八日告畢用工三千五百有奇而內外堅鞏丹堊輝華於舊有加而無不及觀者駭歎謂工於營私者未必如是之敏且辦也發地得泉石刻名曰觀音且言飲者可以愈疾猶是法惠之舊濬而澄之泉甘且冽結亭其上扁以汲古皆不在調度之數而宜其大有不足而反因撙節之有方餘錢三十萬歸之府中而寺有勲臣畫像及書籍歲久脫落又欲爲一碑未能也府帥將作監王君枏復以爲助今皆如所圖不愆于素而求記於某自念老矣豈復爲文頃歲嘗叨簿正博士少列之命三以家諱而改除終不得進退周旋於其間茲喜寺之新因君之請又欲以平日所聞者自見故弗辭君飽學工詞章沈嘿靜重號蜀士之秀而克勤小物乃如此漢之什邡劇邑也辦治有餘力今日葺理官寺朝論翕然

稱之每言前後同寮協力以濟登茲不自以為
勞其言曰今之天下雖不易於為而於其尚可
為之中卒至於不可為者意其無不息之誠且
不能充是心以往故也君之所存者如此宜乎
見諸實用者有此也寺無他碑乾道七年黃公
鈞為碑記謂後世以儀為禮以器為樂其於聖
賢之道遠矣惟儀與器又皆因陋就寡寔非六
經之故蓋嘗誦其言而歎息今鐘鼓玉帛具在
而官寺又備矣若安上治民移風易俗者可不
求其彷彿於古者乎

熙寧太常祠祭總要序

楊傑

宋朝歲祀天地五方帝神州宗廟大明夜明太
社太稷太一九宮膺蜡為大祀文宣武成風師
兩師先農先蠶五龍為中祀壽星靈星中雷馬
祭司寒司中司命司民司錄為小祀凡太常典
禮少府共服器光祿共酒齊黍稷果實醯醢將
作共明水明火太府共香幣太僕共牛羊司農
共豕俎有司應命人或為之騷然熙寧四年冬
詔以諸寺監祠事隸于太常所以肅奉神之禮

也太常初置主簿傑首被命至局之日寺監羣
吏各執故習惘然不知祭酒之聯事傑乃集諸
司所職爲旁通圖一卷以示之於是上知其綱
下知其目大事從其長小事則專達郊廟羣祀
煥然易明有司百執各揚其職職事相聯罔不
修舉命曰熙寧太常祠祭總要云

太常劄子

張孝祥

恭惟陛下祇見郊廟靡愛圭幣懷柔百神獨聲
詩之薦未稱明德伏觀太常所奏樂章第其篇
叙則有詳略之不同稽之文義則或違悟之弗

協三歲之祝祠四時之常祀率用此也而習熟
所傳有司弗議臣甚懼焉恭惟 真宗 仁宗
寔始親制薦饗樂章所以申景鑠宣至和假三
靈之鑿者炳然與日星較著而當時輔臣翰奉
詔而作者亦皆依末光垂典冊雅頌所編不足
道也臣愚欲爲聖慈深詔邇臣凡取太常樂章
更定篇次標列部分具以奏御陛下萬幾之暇
用列聖故事擇宗廟郊禘親祠所用駁發睿思
肆筆而成其餘分命大臣與兩制儒館之士一
新撰述裒爲成書下之太常以俟來歲郊見奏

馬庶幾中興追繼韶勺施之無窮

律詩

贈太常卿張均

杜甫

氣貌神仙迥恩承雨露低相門清議衆儒術大名齊軒冕羅天闕琳琅識介珪通籍踰清瑣亨衢照紫泥弼諧方一展班序更何躋

太常少卿

歷代沿革

周小宗伯少卿之任 **秦漢**無聞 **後魏**太和初置少卿一人 **後周**為小

宗伯景明初少卿為第一清選明禮樂兼天文陰陽者為之 **隋**置少卿一人煬帝置二人

唐武德置一人正觀置二人龍朔改為奉常

大夫 **宋**少卿無職事以為階序品秩元豐正

名始有職掌元祐元年呂純禮為少卿御史

論門蔭得官不可任奉常於是外補中興建

炎三年詔太常少卿一員兼宗正少卿 **大元**

太常卿之下亦置少卿

介卿 左傳君之卿佐 同上 小宗伯

詔相祭祀之小禮凡大禮佐大宗

羣書要語

伯賜卿大夫士爵則儉小祭祀掌事如大宗伯之禮周禮俾居列卿之副公是行呂務簡制太

常貳卿尤為高選臺省侍從多出此途曲阜制

參河海之亞類要官儀亞河海之重胡文恭行

制亞秩象河楊億代表奉常貳卿白集除李常

制宜參稷嗣之業以稱亘祭之遇曲阜制

詩句帝命詩書將壇登禮樂郊杜牧送崔少卿

鎮夏州素尚寧知貴清談不厭貧温庭筠

古今事實

識錞于樂

魏斛斯徵字士亮博覽群書尤精三禮兼解音律自魏雅樂廢徵博采遺逸始備又樂有錞于者或自蜀得之皆莫識徵見之曰此錞于也北史

辨阮咸作

元儋景雲中授少卿行冲以系出跖跋恨史無編乃撰魏典二十篇學者向之有人得銅器似琵琶人莫能辨行冲曰此阮咸所作也雅樂家遂謂之阮咸

增損雜樂

韋萬石上元中遷少卿當時郊廟樂調及醮會
雜樂皆萬石與姚玄辨增損之時人以為稱職

參定雅樂

張文收善音律太宗將創制禮樂召文收於太
常令與少卿祖孝孫參定雅樂

今為清卿

齊太常少卿袁聿脩巡省河南兗州刺史邢劭
與聿脩故舊嘗於省中呼聿脩為清郎至是送
紬為信聿脩不受與劭書曰瓜田李下古人所
謹劭報書曰昔為清郎今為清卿矣 職官分記

使教女樂

唐太宗使少卿祖孝孫以樂律授宮中音樂伎
不進數被讓王珪與溫彥博同進曰孝孫脩謹
士陛下使教女樂又責誚之天下其以士輕乎
通鑑

諷讓中令

薛稷遷太常少卿會鍾紹為中書令稷諷使讓
因入言於帝曰紹京本胥史素無才望今特以
勲進師長百僚恐非朝廷具瞻之美帝然之遂
許讓中令

請置太祝

宋鮮于侁字子駿元祐初為少卿會罷太祝侁言神考釐定官制太常設奉禮太祝難廢咸乞復置仍請自朝廷選有學行者授之職詔從之

同判太常

呂公著嘉祐中同判太常寺數言滌王在殯請燕北使毋用樂輟上元遊幸廢温成廟多見聽用言行錄

同知禮院

張載字子厚號橫渠先生嘉祐三年登第熙寧

二年賜對除崇文殿校書同知太常禮院

錫瑞錦

唐馮定字介夫為少卿文宗每聽樂詔奉常習開元霓裳羽衣舞以雲韶樂和之舞曲成定總樂工閱於庭定立於其間文宗以其端凝若植問其姓氏文宗因吟其送客西江詩錫禁中瑞錦詔悉所著以上遷諫議大夫

賜金紫

宋英宗賜少卿孔叔暮金紫叔暮以勞當遷上不欲以卿監當筦庫之務故有賜後以為例

紀

古今文集

雜著

太常少卿廳壁記 獨孤及

太常掌玉帛鐘鼓等威文物以報本乎天地神祇人鬼凡吉凶賓軍嘉之禮唐虞謂之秩宗周謂之宗伯秦謂之奉常漢謂之太常其掌一也後魏太和十五年始建少卿官少小也用別二卿大小之序亦猶宗伯有小宗伯列國有上卿下卿郡有守丞亦位亞一等以少參長而佐其

成務焉故事自御史中丞給事中中書舍人遷秩為亞卿者必於是司故官因職雄地以人貴餘八卿不敢與太常齒廣德中上尤審官注意禮樂其選也以能不以資以恩澤不以勞謂李公卿材也是用超拜公將以忠孝敬慎肅恭神人且懋其官府政令俾無不恪方議酌前賢之遺塵而損益之乃瞻屋壁所記漫滅於是夏五月己丑皆姓而名之使如珠之貫盱衡拍顧儼若對面目賢者吾得而師之不賢者吾遠而改之賢遠乎哉既進牘然後命博士河南獨孤及

為之志

太常寺丞

歷代沿革

奉常秦官有丞漢多以博士議郎為之蓋五禮六樂所自出也後漢

諸丞皆掌行禮及祭祀小事總署曹事歷代皆有之唐因隋太常丞從五品下凡享太廟則脩七祀于兩門之內分判寺事宋皇祐中詔特差近上知禮官一員兼丞事李泌之請也建炎三年省紹興三年復置今大元太常

寺亦置丞於少卿之下

羣書要語

丞於奉常參總禮樂之事南豐擬
制擢丞禮樂之司胡文公行王昇

制入丞樂卿

丁寶臣制丞諸樂卿贊我邦禮王

珪制奉常禮樂之司丞博士實參論議選用之

重非他寺比

曲阜集周秩制

詩句

臨風曲臺淨對月璧池寒權德輿贈柳博

士兼太常暫輟清齋出太常重携詩卷赴甘棠
自太常丞授工為詩劉禹錫送王司馬之陝州

古今事實

上言得失

前漢谷永數上疏言得失

決定疑議

陶覆之為丞凡宗廟疑議多所決定時人為之語曰定禮決疑問陶覆之

陶氏家傳

懷嫌不去

韋弘為丞父賢以弘當嗣太常職掌陵廟煩劇多過敕弘自免懷嫌不去官及賢疾薦弘坐廟

事繫獄

分記

居官不遷

陳文惠公堯佐居官不妄進取為太常丞十三年不遷

言行錄

記東夷曲

唐天后時李嗣真聞東夷三曲一遍授胡琴彈之無一聲遺忘

復太廟制

范希純為太常丞舊制太廟薦享遂室設常食一牙盤元豐四年奏罷之希純奏請復舊制易其名曰薦羞

東都事略

詔閱工器

東都事略

卷

紹興十一年時大樂久廢詔太常丞周執羔輯
舊聞閱工器而樂始備中興系年錄

首論聖學

李浩孝宗即位以太常丞召至闕首論聖學以
爲人主務學則其餘嗜好無間而入矣曾李程
撰行狀

銅印墨綬

後漢諸丞皆掌行禮及祭祀小事總署曹事皆
銅印墨綬晉宋銅印黃綬齊梁墨綬

介憤皂衣

晉宋九卿置丞進賢一梁冠介憤皂衣

太常博士

歷代沿革

秦官漢叔孫通爲博士定禮制博
士掌通古今員多至數十人後漢

置十四人魏晉時掌引道乘輿王公以下應

追謚者則博士議定之歷代皆有隋四人唐

因之甚爲清選從七品資位與補闕同掌撰

五禮儀注按三公三品以上功過善惡爲之

謚大禮則贊卿導引乘輿贊相祭祀定誅謚

及祥瑞之事宋祥符中置博士二員後四員
元豐正名初除何洵直博士掌講定五禮儀
式有改革則據經審議凡於法應謚考其行
狀撰定謚文有祠事則監視儀物掌凡贊道
之事中興省丞簿而太常博士如故紹興九
年諫議大夫曾統言祖宗朝太常博士四員
今見一員添置一員隆興元年從王大寶等
議併省博士一員大元太常寺亦置博士

羣書要語

曲臺博士稍試汝能曲臺行呂希純制
特陞司絕之屬胡又恭行呂

待問制從司絕之相禮行吳紳制抱蕞相儀行

劉襲禮制典蕞儀於禮閣行景融制典相儀禮

贊道乘輿行章峴制資淹中之學講野外之蕞行蔣秘制儀

同上稍遷禮閣有贊道乘輿之榮行蔣秘制儀

蕞典司行許立制曲臺贊相之儀並胡文恭行

解賓王制訓禮曲臺夏英公行王正倫制漢時

謂博士為禮官亦有稱禮官大夫者晉中興博
士之職端委佩玉朝之大典必詢度焉通典博
士掌辨五禮之儀式奉先王之法制適變隨時
而損益焉凡大祭祀則與卿以導贊其儀六典

朝廷禮制或損益有疑中外謚法或褒貶不決
博士皆得正之白集鄭涵制又太常博士定謚
法掌儀注兩京雜記開元中以太常禮儀聲樂
之司屬亦擇才博士尤為清雅雍洛靈異錄

古今事實

博士入相

崔龜從詔曰博士重官也由此選者繼登三事
而又並時同位者相望元和初權德輿李吉甫
同在相位長慶中竇易直在中書杜元預提印
使西蜀今僕射相公始與鄭文簡公肅中與章
公琮同居中書余復叨重委因志所同以遺它
日亦以知博士之選為重焉時令狐綯父楚亦
以博士入相時人榮之

郎中兼職

裴蒞通古今祀儀為太常博士及至郎中每兼
其職職林

明練典故

李吉甫貞元為博士年尚少明練典故

參綴典儀

張薦貞元中帝親郊時更兵亂禮物殘替為參

綴典儀略如舊章

條次新禮

王彥威淹識古今典禮求為太常散吏補檢討
官彥威采隋唐禮條次彙分號元和新禮上之
拜博士又職林云為曲臺新禮三十卷又採元
和已來王公士民昏祭喪葬為續曲臺禮三十
卷

舉修墜典

柳子厚為陳京慶復行狀云公為博士舉疵禮
修墜典

改集禮院

令狐綯守兵侍同平章事其日南省上事故事
送上而同列必先集於少府監時白敏中崔龜
從皆為太常博士至相位欲榮其舊署乃改集
太常禮院因改為集禮院龜從手筆志其事
典

撰明堂儀

韋叔夏撰立明堂儀註象咸推服

分紀

獲黃鐘樂

李嗣真為博士訪獲黃鐘象樂遂和

造方域圖

呂才為博士造方域圖

專戎府檄

南唐高越遷博士淮上兵起召賜金紫俾專戎府檄書九國志

詳曲亭僕

令狐楚曰叔孫通起帝典於桴鼓之中自此以還鴻生碩儒若賈誼董仲舒公孫洪稀不以此進元帝詔丞相御史明於古今通達國體故為博士今行能在臣右者知其班末祿寡莫不以

博士為愧臣獨以為榮詳曲臺之儀法攷庶僚之功行太常三卿始泣事博士無參集之禮晏公類要

增換樂律

呂才正觀時祖孝孫增換樂律不能決温彦博曰才天悟絕人聞見一接輒究其妙王珪魏徵稱才製尺八十三枚與律諧契

撰進禮書

元祐五年太常博士陳祥道以所撰進禮書精密給事中范祖禹言其精密過於聶崇義詔兩

制詳之通略

榜逐胥吏

陸亘為博士寺有祀生孟真一作禮史久於其事凡吉凶六儀祀官不能達率訪真真倚以倨橫元和冊皇太子真參議偃蹇亘榜逐之胥吏失色

追補容典

商盈孫僖宗時為博士時喪亂後制度凋紊追補容典皆盈孫折衷又昭宗將謁郊廟有司不知樂縣制度盈孫按周法以筭數

正陰陽書

呂才累遷太常博士太宗病陰陽家所傳書多繆偽淺惡世益拘畏命才與宿學老師剗落煩訛共加刊正掇可用者為五十二篇合舊書四十七凡百篇詔頒行天下才於持議儒而不俚云

進清曉圖

米友仁進楚山清曉圖既退賜御書畫扇各二遂除春官外郎人以為榮九朝要畧

宜謚文禮

王居正字剛中為太常博士朝廷懲創王氏邪說之禍會故相韓儀公忠彥請謚公引儀云熙寧初闢近臣坐講之請有功名教宜謚文禮讀者皆竦而韓氏子乃以故事未有以禮為謚者謁宰相求易宰相以謂公公不為改

呂東萊集

改封衍聖

祖無擇遷太常博士至和二年詔封孔子孫宗愿為文宣公無擇言唐開元中謚孔子為文宣王又以其後為文宣公是以祖謚而加後嗣也遂改封宗愿為衍聖公

東都事畧

引誼固爭

唐紹為博士中宗時始郊祝欽明知韋后能制天子欲迎諂之即奏以皇后亞獻安樂公主終獻紹以為非禮引誼固爭詔禮官議衆曲意同徇獎欽明紹獨抗言不可諸儒壯其節

據禮以對

德宗親郊柳冕攝博士據禮以對天子嘉異

議建七廟

尹知章遷太常博士中宗建言以涼武昭王為七廟始祖知章議武昭遠非王業所因乃止

請為別廟

陳正節遷太常博士元宗奉昭成祔睿宗室而欲肅明皇后并安焉正節奏言廟必有配一帝一后禮之正也昭成皇后有大妣之德升配睿宗肅明皇后既非子貴宜在別廟周人奏夷則小呂以享先妣姜嫄也以生后稷故特立廟曰閼宮晉簡文帝鄭宣皇后不配食築宮于外以歲時致享肅明準同姜嫄晉宣后納主別廟時享如儀於是留主儀坤廟詔隸太廟母置官又與博士蘇獻上言睿宗於孝和弟也按賀循說兄弟不相為後商盤庚不序陽甲而上繼先君漢光武不嗣孝成而上承元帝晉懷帝繼世祖不繼惠帝故陽甲孝成出為別廟又言兄弟共世昭穆位同則毀二廟有天下者從禰而上事七廟者所統廣故及遠祖若容兄弟則上毀祖考天子不得全事七世矣請以中宗為別廟大禘則合食太祖奉睿宗繼高宗則裸獻承序詔可

並唐書

奉詔楷書

崇寧中米芾為太常博士奉詔以黃庭堅小楷

字作千字文以獻

九朝要略

從祀贊導

和峴字晦之凝之子也授太常博士從祀南郊
贊導乘輿進退閑雅太祖謂近侍曰誰氏之子
何相禮之明辨乎左右即以峴闕闕對尋拜刑
部員外郎兼掌太常寺

太宗實錄

議郊祀禮

唐裴守真授博士高宗將封嵩山詔禮官議射
牲守真曰據周禮因語郊祀天地自射其牲漢
武帝封太山令侍中儒生射牲至於餘祀無射

牲之文

唐書

去孝弟字

崔龜從太和為博士取明禮家沿革時享宗廟
敬宗祝版稱皇帝孝弟乃去其孝弟從之又稱
九宮皆明室不容為大祠詔皆可其議九宮遂
為中祠

職官分紀

太祝

歷代沿革

周建天官先六大太祝下大夫二
人上士四人掌六祝之辭以祈福

祥秦奉常有太祝漢景帝中元年更名祠祝
武帝太初元年更名廟祀後漢太祝令一人
六百石凡國祭祀掌讀祝及迎送神宋北齊
皆置隋高祖置二人煬帝罷太祝署而留太
祝八員屬寺後又增為十人唐開元減置六
人宋元祐官品令太祝從八品大元置太祝
於博士之下因舊制也

羣書要語

太祝掌六祝之辭曰順祀年祝吉
祝化祝瑞祝筴祀以事鬼神祈福

祥也 周禮天官

古今事實

好學温良

陰猛好學温良稱於儒林以郎遷太祝令

奉禮郎

歷代沿革

後漢大鴻臚有治禮郎四十七人

後齊鴻臚寺司儀署有奉禮郎三

十人後周有理禮中士下士各一人隋太常

有奉禮郎十六人統郊社太廟諸陵煬帝減

置六人唐二人從九品上掌朝會祭祀君臣

之版位武德中改為治禮郎置四人永徽復為奉禮郎開元二十三年減二人宋元祐令從八品大元太常屬亦置此官

古今事實闕

古今文集闕

協律郎

歷代沿革

漢武帝時李延年為協律都尉後漢亦有之至魏武帝杜夔亦為之晉

改協律校尉宋齊亦有其官梁太常屬官有協

律校尉後魏有協律郎北齊二人隋唐因之

宋元祐令從八品大元太常屬亦置此官

羣書要語

掌和六律六呂以辨四時之氣八風五音之節凡大樂鼓吹教樂則監試之為之課限凡淫聲過聲及凶聲慢聲皆禁之使陽而不散陰而不集剛氣不怒柔氣不懾暢於中發於外以應天地之和若祭祀享燕奏樂于庭則升堂執麾以為之節制舉麾鼓祝而樂作偃麾戛鼓而樂止唐六典

古今事實

善新聲

前漢武帝時李延年善新聲以為協律都尉

識舊樂

魏武帝平荊州得杜夔知音識舊樂以為協律郎

太廟署

令丞

歷代沿革

周有守祧之官掌先王之廟**漢**太常屬官有諸廟令長丞**後漢**高廟令世

祖廟令各一人主守宗廟按行掃除無丞

宋太廟令一人領齋郎二十四人**隋****唐**無

聞**宋**別置太廟后廟宮闈令各一人以內侍

充後改以內侍充隸以本寺**大元**置署隸

太常有令丞各一人

並闕

古今事實文集

郊社署

令丞

歷代沿革

周人建國左宗廟右社稷祭天於南郊之圜丘就陽位也祭地於北

郊之方壇就陰位也故有典祀中士二人下士四人以時而祭則徵役於司隸帥其屬而

修除之秦漢魏晉止置太祝令丞宋有明堂
令丞掌宗祀五郊之事齊有太祝及明堂令
梁太常卿統明堂太社等令丞北齊太廟令
丞兼領郊祠崇虛二屬丞郊祀掌五郊羣神
崇虛掌五嶽四瀆神祀後周有司郊上中下
士各一人隋太常統郊社署又置門僕齋郎
唐郊社署令各一人掌五郊祭祀明堂之位
祠祀祈禱之禮丞爲之式宋嘉祐元年置命
將作監主簿石祖元爲之元祐令正九品大
元置署隸太常有令丞各一人

古今事實

闕

古今文集

闕

諸陵署 令丞

歷代沿革

周冢人下大夫二人中士四人掌
公墓之地辨其兆域而爲之圖先
王之葬居中以昭穆爲左右漢太常屬官有
諸陵令元光元年分諸陵邑後漢每園令丞
各一人令秩六百石晉宋隸太常梁改曰陵
監後復爲令班第二品第九後周守陵每陵

上士一人隋諸陵每陵令各一人唐因之開元二十五年諸陵廟隸宗正天寶十二年隸太常後改獻昭乾定橋五陵署為臺升令為五品上至德二年復隸宗正永泰元年隸太常大曆元年復隸宗正後唐應順元年詔特置陵臺令丞各一人宋元祐令陵臺令從六品大元置署隸太常有令丞直長等官又置提點山陵使及副使

古今事實

為茂陵令

漢司馬相如為茂陵令

古今文集

雜著

陵令箴

漢胡廣

昔在皇葉葬野衣薪禮非極哀不樹不封瓦棺即周虞夏攸增壤不毀庸奢不害生是謂皇極百王此經故厚不可始皇薄不可王孫乃眷西漢爰矩孝文陵臣司墓敢告守人

提點山陵

羣書要語

詩句 草草山陵職事厭厭罷相情
懷 韋子厚為永泰山陵使專權有

曾誕敷文作詞略云

古今事實

擅移抵罪

雷允恭擅移永定陵皇堂而丁謂蒞之朝廷命
呂許公與魯肅公乘傳按視盡得其迹及允恭
等盜沒金寶以萬計狀聞抵允恭罪而謂罷相

上疏求去

宋韓魏公嘉祐末以翊戴功輔英宗既為永昭
山陵使事畢而上不豫公先自上疏云自有唐
至于五代山園使事訖求去今先帝已祔廟而
臣時為山陵使事恬然不能援故事去位則是
不知典故天下且謂臣何神宗再三留之卧家
不出

太樂署

歷代沿革

周大司樂掌成均之法以樂舞教
國子樂師掌國學之政教國子又

有太師掌六律六同以合陰陽之聲至秦漢

奉常屬官有太樂令丞又少府屬官有樂府令丞後漢太常樂令一人秩六百石魏復為太樂令丞晉元帝併于鼓吹宋太常有太樂令丞齊梁因之又別領清商丞及有庫丞陳因之後魏太和間置太樂博士北齊置令丞後周有司樂上士中士隋令丞二人唐因之武德後置內教坊于禁中如意元年改曰雲韶府以中官為使開元二年又置內教坊于蓬萊宮側有音聲博士京都置左右教坊掌非優雜伎自是不隸太常開成三年改法曲

所處院曰仙韶院大元置令丞隸太常寺

羣書要語

掌伎樂凡國祭祀掌請奏樂及大饗用樂掌其陳序漢書掌教樂人

調合鍾律以供邦國之祭祀享燕采為之貳唐

六典官商角徵羽職在太樂漢律歷志陶唐五

帝設為六樂楊雄太樂令

古今事實

應圖識

明帝永平十三年曹褒奏尚書璇璣鈴日有暈漢德微作樂名太詔改太樂令丞以應圖識續

漢書

正雅樂

魏黃初中以杜夔為太樂令使正雅樂時散騎侍郎鄧靜善詠雅樂歌樂師尹相能習宗祀之典舞師馮肅曉知前代諸舞夔與創定遷協律都尉

教官伎樂

成帝成和中詔太樂令戴綬教官伎樂賜米百石布二十疋

晉起居注

古今文集

雜著

漢官考太樂令注 徐筠

按周官太司樂中大夫二人而屬于禮官之宗伯古者取士必繇乎學其教之也必先乎樂大司樂學官也掌成均之學政樂非亶鐘鼓而教亦必非佔畢之謂而已自漢以後射策決科之學勝博士弟子員徒以區區之文為黜陟之令雖同領屬于禮官之太常而大司樂不復與聞學政專治樂事所謂樂德樂語非復先王之舊矣

新編古今事文類聚卷之二十六

新集

新編古今事文類聚卷之二十七

新集

南江富大用時可編

諸寺部

大理寺卿

歷代沿革

大理古司刑官也舜命臯陶作士
 正五刑孔安國曰理官也周官為
 司寇晉文公使李離為理秦置廷尉掌刑辟
 有正左右監漢因之景帝更名大理武帝復
 為廷尉宣帝置左右廷尉平哀帝復為大理

取天宮貴人之牢曰大理之義後漢復為廷尉郡國讞疑皆處當以報魏復為大理復改廷尉以世宗為之而郭氏尤盛郭氏自弘後數世傳法律子孫至廷尉者七人梁為秋卿加卿字曰廷尉北齊復為內之卿隋為大理寺唐因之卿一人少卿二人龍朔二年改為詳刑寺咸亨復武后光宅元年改為司刑寺神龍復卿一人掌鞠獄定刑決諸疑讞宋大理寺以朝官一員或二員判寺事一員兼少卿事建隆二年以工部尚書竇儀判寺事會

要故事臺省長官兼判公事得言判某官事

如晉朝尚書左丞霍祝兼判太常卿事是也若止言寺事則其屬丞正並可行之竇儀兼判太常寺又兼判大理寺事皆一例也凡獄訟之事隨官司決劾不復聽訊但掌斷天下奏獄送審刑院詳訖同書以上于朝熙寧九年神宗謂國初廢大理獄非是以問孫洙洙對合旨於是下詔以京師官寺凡有獄皆繫開封府司錄司及左右軍巡三院囚逮猥多難於隔訊又暑多疫死因緣留滯動涉歲時

稽參故事宜屬理官可復置大理獄天下奏
案刑部審刑院詳斷置卿一少卿二丞四官
制行左斷刑右治獄各五案 左廳斷刑曰詳
刑詳讞宣黃分簿奏表右廳治獄曰左推右
推寺案知雜檢治卿掌折獄詳刑鞠獄之事
凡職務分左右天下奏劾命官將校及大辟
囚以下以疑請讞者隸左斷刑則司直評事
詳斷丞議之正審之若在京百司事當推治
或特旨委勘及係官之物應追究者隸右治
獄則丞專推鞠蓋少卿分領其事而卿總焉
建炎三年併省寺監而大理如故省卿而斷
刑治獄少卿各一員今 **大元** 仍唐宋舊置大
理寺掌審斷天下奏案凡刑獄之事以大理
卿為之長

羣書要語

允書舜典帝曰臯陶惟茲臣庶罔或干于正汝
作士明于五刑以弼五教 大禹謨宥過無大刑
故無小罪疑惟輕功疑惟重 臯陶 臯陶為大理
天下無虐刑文子大理曰大棘鄭氏談綺大理

掌折獄詳刑鞠獄之事初學記凡聽五刑之訟成獄辭史氏以獄成告於王王聽之正獄成告于大司寇聽之棘木之下注正周卿師之屬竹刑棘署三尺記王制

又聽獄於棘木之署白氏六帖以五聽察其情一曰氣聽二曰色聽三曰

視聽四曰聲聽五曰詞聽以三慮盡其情一曰

明慎以謝獄二曰哀矜以雪寃三曰公平以鞠

庶獄六典舜命臯陶刑惟明允漢尊定國道在

寬仁六帖漢用平允任先張釋魏推明察選在

鍾繇官尊九寺位重三章並同上大理寺專

獄犴視刑書我國家生人之司命也元微之行

表重光制榮加天寵職察雲司必能利用文明

哀矜庶獄陳子昂為司刑卿讓官表邈矣臯陶

翊唐作士設為犴狴九則允理如石之平如淵

之深三槐九棘以質以聽理臣司律敢告執獄

後漢崔德正箴天降五刑惟夏之績亂茲平人

不回不僻楊雄廷尉箴矧古士官為今理寺典

于庶獄糾是羣司牋表類

詩句上卿才大名不朽早朝至尊暮求友高適

宴大理寺卿

古今事實

石奢守法

楚昭王有士曰石奢者公正好義王使為大理於是廷有殺人者奢追之即其父也遂反於廷曰殺人者父也以父成政不孝不行君法不忠弛罪廢法而伏其辜僕之所守也伏斧鑕命在君君曰追而不及庸有罪乎子其治事矣石奢曰不私其父非孝也不行君法非忠也以死罪生非廉也君舍之上之慮也臣不敢失法下之行也遂不離斧鑕刎頸而死于庭

新序

李離伏罪

晉文公時李離為大理過聽殺不辜自繫曰臣之罪當死文公令之曰官有上下罰有輕重是下吏之罪也非子之過也離曰臣居官為長不與下吏讓位受爵為多不與下吏分利今過聽殺無罪臣之罪當死遂伏劍而死

以稱朕意

唐臨累遷大理卿正觀八年問獄囚係之數對曰見囚五十餘人唯二人合死上怡然謂曰昔東宮卿已事朕以疇昔相委故授卿此任然為

國之要在用法法刻則人殘寬則失有罪惟是折中以稱朕意唐史

曲盡人情

隋楊汪守大理卿帝將親省囚徒其時計囚二百餘人汪通宵究審朝而奏曲盡人情帝甚嘉之

久在廷尉

國初劇可久拜大理卿性沉毅方正在廷尉四十年用法平允以仁恕稱分紀

超拜侍中

張文瓘兼大理卿至官旬日斷疑獄四百抵罪者無怨言文瓘有疾繫囚相與齋禱願其視事當時咸稱其執法平恕比戴胄焉拜侍中大

奉法持正

諸囚一時慟哭其感動人心如此

持法明審

鄭善果為卿奉法持正風績顯於公卿

戴胄據正

范說為卿持法明審並職林

摘言若湧泉

唐卿非冤

唐臨遷大理卿高宗親錄死囚前卿所斷者悉號叫稱冤臨所入者獨無言帝怪問狀囚曰唐卿所斷既非冤濫所以絕意爾

得賢為盛

唐朝以來有劉德威張文瓘唐臨為大理卿設官之重得賢之盛人到于今稱之制白集許季同

治獄見稱

王殷為大理務在寬恕與鍾繇以治獄見稱上同

無阿朕意

唐正觀八年上謂大理竇誕曰法官卿為之長也朕以至公臨天下法之所行無捨親昵卿當保所長棄所短無阿朕意以虧憲典本傳

誠在主上

劉德威為大理卿太宗問德威曰近來刑網稍密其過安在德威奏言誠在主上不由臣下人主好寬則寬好急則急律云失入減三等失出減五等今則反是無辜失出則便獲大罪所以吏各自愛競執深文非有教使之然畏罪之所

致耳太宗然之

更遺衣食

唐張道原拜大理卿何稠士澄得罪籍其家屬
賜羣臣道原曰禍福何常安可因已之泰利人
之否取其子以為僕妾豈仁者之心皆捨之一
無所取更資以衣食遺之

不樂法家

元澹遷大理卿不樂法家因謝所居官 六帖

比漢于張

唐徐有功曰身為大理人命所懸不能順旨詭
辭以求苟安時人比漢于張 並唐書

稱侔于張

晉潘岳楊荊州誄曰惟此大理國之憲章聽參
臯呂稱侔于張 初學記

不受贓錢

向敏中判大理寺時沒入祖吉贓錢分賜法吏
敏中引鍾離意委珠事獨不受 國史

不賀獄空

李浩大理奏結獄上顧輔臣曰棘寺當得剛正
如李浩者為之已而卿闕上曰無易李浩遂除

大理卿故事寺獄空上表賀公獨不奏言行錄

古今文集

雜著

刑法論

楊廷秀

臣聞古之立法不惟懲天下之已犯亦以折天下之未犯蓋已犯之必懲未犯之所以必折也是故懲之者法之義折之者法之仁義行故其仁不窮仁行故義不數仁義相有而不相無此法之利也後之法非無仁義也利未見而害先焉者義數而仁窮而已義不可數數則民怨仁不可窮窮則民狎狎則犯者衆而刑者數然則刑至於數者不生於刑之數而生於仁之窮民至於怨者不生於怨其刑而生於狎其法今夫民之情固喜溫而惡寒欲涼而畏熱也然冬不寒夏不熱則民病而死矣人知夫法之仁也不知夫狎之而死也是故愛極者恩之所從銷寬甚者猛之所自起古之聖人其法初不及後世之備也惟使不仁之窮而民之狎也是以法立而刑不試後之法蓋詳且密矣然文詳而舉之也略網密而漏之也踈天下之民窺其略也則

知其詳必至於不舉習其疎也則知其密必至
於甚漏知其不舉則犯之也易知其甚漏則犯
之也頻刑安民不數而民安得不怨哉嗟乎求
用刑之疎者必至於用刑之數求天下之喜者
必反以得天下之怨理固然也然則所謂舉之
略而漏之疎者何也一曰法不執而多爲之岐
二曰法徒設而自廢其禁罪莫大於殺人罪至
於殺人何以議爲也則亦殺之而已漢高帝如
此其寬仁也入關之初欲結天下之心如此其
亟也欲除秦法之苛如此其銳也而其與民約
法亦曰殺人者死帝不以爲疑民亦不以爲請
何則上下皆便其當然也殺人而法不死孰不
相殺以至於大亂哉此豈所謂當然而天下何
便於此也故雖高帝欲取天下之速而不敢宥
殺人之罪以謫天下之心雖秦民之苦於秦而
不以高帝之不宥殺人爲帝之霍然則古之立
法之意可知已矣而今之法不然殺人一也則
有曰盜曰鬪之目焉則有曰故曰謀曰誤之別
焉曰盜曰謀曰故者法之所必死也曰鬪則死
生之間也曰誤則生矣果誤也而殺人也又况

所謂誤者未必誤而所謂非謀非故者未必非謀非故也何則法不執而吏可賣吏可賣而民可遁有司取具獄而讀之曰此真誤殺也不知夫吏之竊笑也此之謂法不執而多為之岐夫民之所以畏法者何也非畏法也畏刑也法不用則為法法用之則為刑民不犯則為法民犯之則為刑是以畏之也有法而不用不如無法何則無法則民未測其罪之所當有法而不用則民知其法之不足忌有法而民不忌是故布之號令不曰號令而曰空言垂之簡書不曰簡書而曰文具法至於為空言文具是無法賢於有法也古之法始乎必用而終乎無所用今之法始乎不用而終乎不勝用夫法不求民之入而拒民之入者也古之法民不入也不招以入而民之入也不縱以出夫惟不出是以不入故始乎必用而終乎無所用今之法有曰誣人以罪而不實者罪之以其罪自大辟以降皆是物也而用法者不然以一夫之片紙而與大獄鞠大罪也卒之所謂大獄者初無獄之可與所謂大罪者亦無罪之可鞠上之人則俱釋之而已

矣受誣者至於破家亡身而誣人者其極不過
杖而遣則奸民何憚而不屢誣善良以求利也
哉獄訟何時而可清也故始乎法不用而終乎
法不勝用此之謂法徒設而自廢其禁蓋人有
野於宅而盜於防者其始峻其墻而止出於一
門又從而衛之以兵非以制其出者也以制其
入者也夫是以盜不敢過未幾而慮夫樵牧者
出入之迂也則鑿其東而門焉又鑿其西而門
焉門多且徑而不能皆衛也則至於有門而不
扃焉門多且徑則盜從其徑者而入之矣有門
不扃則羣盜掉臂而入矣法不執而多爲之岐
孰不從其徑而入哉法徒設而自廢其禁孰不
掉臂而入哉臣願朝廷詳慮而審處之如殺人
者不死此法不可以更議而誣訴者罪以其罪
此法可以必行議其所當議而行其所不行則
成康不式之事雖未易致也而漢文幾措之風
其猶可及也歟

烏巢大理寺獄戶賦

韓鎡

皇帝恩霑庶類道格玄功化覃於萬國之間苛
慝不作烏巢於園扉之內囹圄知空足驗時清

可知刑措蒼鷹莫執寧懷獄吏之憂踈網無加
豈有虞人之懼定國徒美於詳明何施善政治
長不罹於縲紲豈見銜冤

大理少卿

歷代沿革

後魏置少卿 **北齊**及**隋**因之 **唐**置
二人 **宋**以朝官一員兼少卿事神

宗置大理獄少卿二員以蹇周輔楊汲為之
分左斷刑右治獄元豐初循唐制歸百司獄
于大理周輔首選為少卿建炎中興省大理

卿而少卿二員如故 **大元**仍唐宋舊置大理
少卿

羣書要語

遷少大理 韓文 屈居亞列未副羣
情 同上 參典之官 南豐擬制 貳正

之選 同上 除韓晉卿

詩句 佐棘竟誰同因思證聖中事雖亡復報理
合有陰功

古今事實

行若登仙

唐倪若水開元初班景倩自揚州採訪使入為

少卿過州若水餞于郊顧左右曰班公是行若登仙吾恨不得為騶未幾入為戶部

唐書

薦為宰相

張東之傳武后它日求人仁傑曰臣嘗薦張東之未用也后曰遷之矣曰臣薦宰相而為司馬非用之乃授司刑少卿

唐書

真為長者

鄭利用餘慶從父兄也真長者由大理少卿為御史中丞後由中丞為大理卿

妙選正人

唐太宗謂侍臣曰大理之職人命所懸當妙選正人用心存法無過戴胄者乃以為少卿

唐新語

所守公法

唐徐有功轉司刑少卿皇甫文備誣有功縱逆黨久之文備坐事下獄有功出之或曰彼常陷公於死今生之何也對曰爾所言者私忿我所守者公法不可以私害公

綽論撼木

隋高祖禁惡錢有二人入市以惡錢易者上令斬之綽曰此人當杖上曰撼大木不動者當退

對曰臣望感天心何論動木上乃止

孫諫走馬

孫伏伽轉大理少卿太宗嘗馬射上書諫曰臣聞千金之子坐不垂堂百金之子立不倚衡以此言之天下之主不可履險乘危明矣竊聞陛下猶自走馬射獵娛悅近臣竊為陛下有所不取也此祇是少年諸王之所務豈得既為天子今日猶行之乎陛下雖欲自輕其柰社稷天下何太宗覽之大悅

執法一心

隋趙綽為少卿時刑侍辛亶嘗衣緋視上以為厭蟲將斬之綽曰據罪不當死上怒將斬之對曰執法一心不可惜死上入良久乃釋之賜物三百段

有司常典

源師煬帝時為大理少卿帝出顯仁宮敕衛士不得輒離所守有一主帥私令衛士出外帝付大理師據律當徒帝令斬之師奏曰若陛下初便殺之自可不關文墨既付有司義歸常典或宿衛近侍更有此犯將何以加之帝乃止

並隋書

論情免死

吏部尚書長孫無忌不解佩刀入東上閣門封
德彛議以監門校尉不覺當死無忌罰銅二百
斤戴胄駁曰若論其誤則為情一也而生死頓
殊敢以同請上嘉之竟免校尉死

論獄無冤

戴胄論刑獄事皆無冤濫參處法意至析秋毫
隨類指摘言若湧泉一無遺慮帝益重之

司刑平反

徐有功為少卿時周興來俊臣等羅織天下衣
冠近族者數千百家有功司刑平反者不可勝
紀時人方于定國

執論守正

崔昇兄元暉位宰相先是酷吏誣籍數百家元
暉開陳其枉宋璟劾張昌宗不執事元暉頗助
璟及有司正張昌宗罪而元暉弟昇為司刑少
卿執論大辟兄弟守正

請崇寬簡

唐韓瑗武德初為大理少卿受詔掌定律令瑗
言於高祖曰官吏至公自當奉法苟若徇已豈

顧刑名請崇寬簡以允惟新之望高祖然之於是採定開皇律行之

當示大信

戴胄遷大理少卿犯顏執法者甚多時有託資蔭冒牒取調者詔許自首不首罪當死俄有詐得者獄具胄以法當流帝曰朕詔不首者死而今當流是示天下不以信卿賣獄耶胄曰法者布大信於民言乃一時喜怒所發陛下以一朝忿將殺之既知不可而責於法此忍小忍存大信也若何忍違信臣為陛下惜之帝大感悟

奏莫搖動

太和四年大理少卿崔杞奏大理寺即陛下守法之司一定之制不可搖動若朝示而暮改同罪而異刑則人何所措其手足哉續通典

號為明習

仁宗時陳太素權大理少卿又判大理寺號為明習法令國史

議頗近厚

宋少卿王表多稱長者上謂宰執曰表以淳朴治獄既要人情又不可慘刻張守曰表雖法科

議刑頗近厚

言行錄

持以明恕

呂忠穆公頤浩為相上謂宰執曰昨日大理少卿元袞面奏朕戒以持法明恕頤浩曰惟明克允乃用刑所先也

古今文集

關

大理寺正

歷代沿革

正周卿師之屬**秦**置廷尉正一人

漢廷尉正監及平謂之廷尉三官

秩千石梁服獬豸冠銅印墨綬第六品隋煬

帝增置六人唐置二人龍朔改為詳刑大夫

光宅中為司刑後復故掌議獄正科條凡丞

斷罪有不當者則以法正之掌參議刑辟詳

正科條之事宋神宗復置大理獄後置寺正

元豐五年刑部奏乞分評事司直與正為斷

司丞與長貳為議司凡斷案先上正看詳當

否論難改正然後過議司復議建炎併省斷

刑治獄寺正各置一員大元仍宋舊置大理

寺正

羣書要語

成獄辭史以告于正王聽之

王制

鷓鴣作士雖參聽棘之言

許公集

爾其明習刑書往正寺事

初寮制

議刑典獄惟

明克允

除葉預制

正於理官參贊為重

南豐制

詩句

古風真往哲雅道濫朝聞治獄威豪右銷

時賴典墳

大理正任章和江淹擬古章寄來詩

垂印銀棘庭持斧栢臺綱

范咸送大理正攝御

史詩

古今事實

南土秀望

晉顧榮字彥先以南土秀望累遷廷尉正

寺中二絕

宋世執為廷尉少卿蘇軫之為正寺中語曰決

定嫌疑蘇軫之視表見裏蘇世執人以為二絕

北史

何家陰德

何氏家傳云比干夢貴容車騎滿門覺以語妻

語未已有老姥謂比干曰公有陰德今天錫君

策因出懷中符策狀如簡長九寸凡九百九十

枚以授比干子孫佩佩綬者當如此自汝陰徙

平陵代為名族分紀

顧協清嚴

顧協初為廷尉正冬服單薄寺卿蔡法度欲將
襦與之憚其清嚴不敢啓口南史

黃霸持平

漢宣帝聞黃霸持法平召為正數決獄廷中稱
平

比干濟活

漢張湯與何比干同時為寺正湯持法深而比
干務仁恕數與湯爭所濟活者千數

罪宥所疑

魏司馬芝遷大理正有盜官絹置都廁上者吏
疑女工收以付獄芝曰刑罪之失失在苛暴今
贓物先得而後訊其辭若不勝掠必致誣服誣
服之情不可以折獄且簡而易從大人之化也
不失有罪庸世之治耳今宥所疑以隆易從之
義不亦可乎太祖從其議魏志

推察得情

蘇瓊為廷尉正時畢義雲為御史中丞以猛暴
任職理官忌憚莫敢有違瓊推察務在得情雪

者甚衆寺署臺按始自於瓊也北史

上應正論

唐王志愔為大理正奏言法令者人之隄防不立則人無所禁竊見大理官員多不奉法以縱罪為寬恕以守文為苛刻遂上應正論以見志唐書

奏明律令

魏陳琳橋玄奏琳明律令徵拜廷尉正

持法平允

宋范旻質之子也判大理寺正持法平允太宗實錄

議獄平允

孔承恭遷大理正議獄平允豐制權判大理少卿南

大理寺丞

歷代沿革

晉武寧咸寧中因曹志上書請廷尉置丞

隋改為勾檢官 **唐**置丞六

人掌分判寺事正刑之輕重 **宋**神宗復置大

理獄丞四員命卿少舉官元豐五年命莫君

陳等九人為大理寺丞始自朝廷差官也舊

制斷刑寺丞六員建炎三年減三員治獄寺丞減二員大元仍唐宋舊置大理寺丞

羣書要語

前為廷丞察獄詳刑頗聞敬謹白

集行薛元賞制眷茲廷尉設屬惟

良爾通敏有稱宜丞寺事初察制宜丞棘路胡

文恭行皇甫采制往丞法卿張子諒制參丞理

官張靖制進丞法局徐仲容制進丞讞寺鄭京

制稍遷讞丞刀總制用除棘路之丞往治竹刑

之書王尹制擢丞京司典治刑讞呂湜制治讞

之丞尹立制往司李法之讞李偉制黃帝李法

見漢書胡建傳進丞卿讞晏詹制擢任法卿之

丞參司刑讞之典並胡文恭行毛維藩制法卿

貴丞公是行暢均制往贊廷理符穆之制

古今事實

生死所遇

唐杜景佺徐有功為司刑丞與來俊臣侯思止

同理獄人稱之曰遇徐杜必生遇來侯必死唐書

生死不離

胡元禮自丞遷少卿嘗出一死囚元禮判殺之

曰元禮不離刑曹此人無活法李日知報曰日

知不離刑曹此人無死法竟以兩狀申日知果

直御史臺記

上大寶箴

張蘊古太宗初即位上大寶箴太宗嘉之賜以
束帛除大理丞初河內人李好德素有風疾而
語涉妄妖蘊古究其獄稱好德癩病有徵法不
當坐御史權萬紀劾蘊古情在阿縱奏事不實
太宗大怒小子乃敢亂吾法邪令斬於東市太
宗尋悔因發制凡決死皆命所司五覆奏自蘊
古始

解善才罪

武衛大將軍權善才坐誤斫昭陵栢樹仁傑奏
罪當免職高宗令誅之仁傑曰陛下必用變法
請從今日始臣不敢奉制殺善才陷陛下於無
道帝意解善才因而免死並唐書

用法寬平

李日知遷司刑丞時用法嚴急日知獨寬平無
冤濫者唐書

斷獄無冤

狄仁傑為大理丞周歲斷獄一萬七千人時稱

平恕無冤訴者

策陳邊事

宋天聖中大理寺丞石延年上書陳十策乞選
練兵級言西夏必叛朝廷不以為然及元昊反
上思其言召見乞奉使河東籍兵回稱旨上曰
知卿才久矣

書言還政

石延年遷大理丞上書言天子春秋已盛太后
不當聽政及奉使河東回得秘閣校勘

古今文集

古詩

江陵道中呈李孫三學士

韓愈

棲棲法曹掾何處事卑陬生平企仁義所學皆
孔周早知大理官不列三台儔何況親犴獄猷
撈發奸偷懸知失事勢恐自罹置罟

大理司直

歷代沿革

後魏

永安三年高穆奏置司直十
人位在正監上不置曹事唯覆理

御史檢劾事唐置六人掌承制出使推覆若
寺有疑獄則參議之宋熙寧中置大理獄至
元豐五年始命程嗣先四人為司直建炎三
年詔斷刑司直兼治獄司直其治獄司直罷
大元仍唐宋舊置大理司直

闕

羣書要語

詩句

不耻青袍故尤宜白髮新

李嘉祐送韋司

直西行詩

清絕聞詩語疏通豈法流傳家有衣

鉢斷獄盡春秋

東坡和許朝奉詩驛驢事天子

辛苦在道路司直非冗官荒山甚無趣

杜甫送

高司直尋封閩州詩

古今事實

馳傳決獄

唐王祚為司直馳傳決獄所至仁平

唐書

連署斷獄

大理司直凡大理斷獄皆連署

白氏六帖

先進魚書

司直凡承制而出先請魚書以往

月上

進列理官

鍾邦彥除大理司直制 云云進列理官

大理評事

歷代沿革

漢宣帝初於廷尉置左右平秩六百石負四人**後漢**光武省右平惟
有左平掌平決詔獄冠法冠**魏****晉**以來無左
右兩直謂之廷尉平**隋**置大理評事**唐**正觀
中褚遂良議重法官奏置評事十員掌出使
推覆後加為十二員**宋**熙寧置大理獄至元
豐五年始命張仲穎等十二人為評事隆興
二年詔大理評事以八員為額**大元**仍唐宋

舊置大理評事

羣書要語

或問近世名卿曰若張廷尉之平
揚子預參評於詔獄 唐陳子昂為

陳舍人讓官表

評刑北寺鸚鵡之政無聞 同上

俾參評讞之聯 胡文恭行陳知德制 特寵法卿

之屬俾參詔獄之評 趙真卿制 對司理法之平

王鑑制 佐法卿之評 張希甫制 升屬列卿平亭

疑法 陳叔度制 擢任刑評 崔公孺制 俾評刑於

卿屬 俞祐甫制 刑讞是評 並胡文恭行馬琮制

俾參議讞

初察王恬制

秋官覆天下之獄而其

屬能平亭其所疑

王岐公集

詩句

廷評近要津

杜甫送王評事

勿嫌法官未

登朝

韓詩

評事不讀律博士不尋常

張鷟車載

斗量詩

佇聞明主用豈負青雲姿

岑參送顏評

事棘寺初銜命梅仙已誤身

劉喜卿夜宴評事

拜命詩

古文事實

擢拜理評

唐杜暹授鄭尉以清節見知華州司馬楊孚公

直士也深賞重之孚遷大理正暹坐公事下法

司結非孚謂人曰若此尉得罪則公清之士何

以施矣特薦之於執政由是擢拜大理評事

改授殿直

有陳舜封者舉進士為大理評事因奏事頗言

語捷給舉止類倡優上詰之自言其父承業善

箏為都知上謂宰相曰此雜類安得任清望官

蓋執政不為國家區別品流之所致即改授殿

直

其為置平

漢宣帝詔曰吏用法巧文滋深其為置廷平其
務平之於是選用于定國黃霸等漢書

不宜廣濫

晉顧榮遷拜廷尉平時趙王倫欲誅淮南王
允官屬下廷尉議罪榮言不宜廣濫倫意解
榮濟者甚眾中興書

以行能遷

馬官行能高潔遷廷尉平並同上

上便宜除

晉何攀上便宜除廷尉平晉史

反覆詰對

敬昭道為評事時沂州有反者詰誤坐者四百
餘人昭道反覆詰對執政無以奪詰誤者悉免
唐新語

叱咤風生

王敬由為評事奉使河南叱咤風生到廣陵訪
裴謨謨曰評公使車留此一宿得無驚郡將乎
廣記

居九寺省

唐姚正操云自余以評事入臺後相繼不絕韓

琬以爲不然自則天好法刑曹望居九寺之首
以此評事多入臺迄今爲雅例非正操所能升
降也

號三緊官 又見拾遺門

拾遺立緊評事出緊赤尉坐緊緊者以其銜思
按覆彈射不法也故俗號三緊官大理刑獄
之司自卿已下每以明詳法理者爲之吏部參
注拾遺評事皆以才望清高標格孤秀者署之
俗號爲三緊官 西京雜記

文苑

○雜著

涿郡太守上宣帝書 鄭昌

聖王之法明刑者非以爲理救衰亂之起也今
明主躬垂明聽不置廷評獄將自正若開後嗣
不若刪定律令律令一定愚人知所避就姦吏
無所弄今不正其本而置廷平以理其末政衰
德怠則廷評將招權而爲亂首矣

崔評事墓銘 韓愈

君諱翰博陵安平人通儒書江南人士多從之
遊汝州刺史吳郡陸長源引爲防禦判官表授

試大理評事貞元十五年終于家銘曰朝之言
嘻嘻夕之言怡怡借入而出乘馬而馳一日不
見而死吁其可悲

裴評事墓誌

柳宗元


穆曰起居郎生均州刺史均州與其弟大理裴
伯言更爲刑部郎用文吏名于朝善杜禮書長
子曰某射進士策進大理評事當伐蔡及鄆汴
常爲軍首贊佐有勞元和十四年終于河南銘
曰世守不遷秀于士鄉不利有司爰客于梁梁
委其躬乃相戎政官臣理屬官臣太子舍人理

屬大理評事


仍受國命南蔡北曹五載首兵柔

剛輔理平視太平馬牛既寧告成于京棧車草
草我來周道載飢載勞神奪其孝形經于洛魂
其焉如

新編古今事文類聚卷之二十七



新集





事文類聚新集

廿八之冊

十八

| | | | |
|-------|---|---|---|
| 館書圖京東 | | | |
| 一 | 三 | 別 | 類 |
| 冊 | 號 | 加 | 書 |
| | | 函 | 門 |
| | | | 類 |





寺部

漢學文庫

大司農

附

司農卿

歷代沿革

少皞

氏以九扈為九農正

扈通典

作鳩

注

鳩鳥也鳩有九種以為農

號

舜

命棄為后稷播時百穀

周

禮有太府掌九

賦九貢

秦

為治粟內史掌穀貨韓信歸

漢

為治

粟內史掌九穀六畜之供膳羞者凡郡國諸倉

農監都水六十五官皆屬焉通典云屬官有大

倉均輸平準都內籍田五令丞平帝改曰羲和以劉歆爲之又改爲納言後漢爲大司農掌諸錢穀金帛及諸貨幣郡國四時上月旦見錢穀簿邊郡諸官請調度者皆爲給報損多益寡取相給足郡國鹽官鐵官並屬歷代皆有梁置十二卿以署爲寺官爲春卿唐有司農卿龍朔改爲司稼咸亨復卿掌邦國倉儲委積之事摠四寺諸監謹其出納摠上林太倉鉤盾導官四署京師百官廩祿皆仰給焉朝會祭祀共御所須皆共焉孟春皇帝親籍田之禮有事於先農則奉進耒耜季冬藏冰祭司農以黑牡秬黍仲春啓冰亦如之。

宋朝司農寺判寺事二人以兩制或朝官以上充熙寧二年立常平歛散法三年詔以新法付司農寺而農田水利免役保甲等法悉自司農講行元豐官制行寺監不治外事遂循唐典正其職秩司農舊職悉歸戶部右曹續會要司農掌倉儲委積之政令總苑囿庫務之事而謹其出納京都官吏祿廩諸路歲運至京師悉掌焉凡苑囿行幸排比及薦饗進御頒賜植藏之物

與造麴藥給薪炭皆戒有司以時辦具天子親耕籍田則奉耒耜所隸官屬凡五十倉二十有五草場十有二排岸司四園苑四建炎三年詔罷司農寺紹興四年復置司農寺卿少各特置一員**大元**置大司農司有大司農及卿少卿丞等員

羣書要語

大府掌九賦九貢注云王者主治藏之長若今司農矣周禮大府下

大夫同上九扈為九農正扈民無佻者也左傳天倉者司農也天文要集司農少府國之泉也

史游急就篇

量者龠合升斗斛也職在大倉司

農掌之漢律歷志惟時大農爰司金穀粒民是

職帝王之盛實在農殖又曰農臣司均楊准文

司農箴改授農政于彼野王倉盈庾億國富兵

強文選乃司大農掌是六府崔瑗鮑德誅陳粟

萬石揚以簸之漢武帝相梁詩阜茂豐物和鈞

關石張華箴穡臣司農同上命爾司稷之位公

是行魏掞制冠儀農扈慶元制農天下之本也

故國有九列而司農氏居其一焉唐元稹行裴

武授制假以秩宗之榮用制國泉之重同上

古今事實

行不賚糧

前漢鄭當時為大司農門下亡貴賤亡留門者執賓禮以下山東諸公翕然稱鄭莊武帝曰吾聞鄭莊行千里不賚糧

居處節儉

漢宣帝時北海太守朱邑以治行第一為大司農居處節儉

以清明掌

漢朱邑為大司農張敞與邑書一足下以清明

之德掌周稷之業 並漢書

以清白稱

高詡字季回以儒學徵拜大司農在朝以清白方正稱 東觀漢記

稱為名卿

牟融為大司農性明達稱為名卿 同上

稱以清正

後漢鄭眾為司農在位以清正稱

論議便宜

耿國為大司農曉邊事能論議數上便宜事天

子器之

學問博通

王孫端學問博通為大司農

非儒不選

唐裴武授制非牟融之循理康成之儒學不在

茲選元稹傳

非德不交

趙典字仲經為大司農閉門却掃非德不交並

續漢志

漢崇儒學

漢崇儒學選正鄭玄注以公車徵為大司農給

安車一乘所過長吏迎送六帖

晉寵貞廉

晉寵貞廉任先崔氏注晉崔洪為司農手不執

珠玉口不言貨財六帖

古今文集

雜著

司農寺壁記

張維

漢置九卿大司農其一也初由治粟內史錢穀之問實專其責後又置五尚書分主曹事魏稍

損益之始置度支尚書掌軍國支計而大司農之職分矣其屬有度支左戶右戶倉部金部見於齊志隋更左右戶曰戶部又更度支尚書曰戶部尚書唐因之初亡所革至中葉國用不足始置鹽鐵使繼又置度支使未幾罷使名而以戶部侍郎判度支兼諸道租庸鹽鐵使歷五代以戶部度支鹽鐵為三司於是有三司使或以重臣判三司或以宰臣分判一司或以租庸使管轄三司至于國朝則置左右計使摠計使既又罷之三司使如初元豐官制行三司并入戶

部唯常平免役新法與夫農田水利則隸司農太上中興司農勿用紹興三年復置一丞而卿少主簿駸駸復矣淳熙三年春治新寺宇舊題名弗稱廼礪石以易之卿李椿屬維紀事維竊謂九卿非古也周官六卿與三少為九漢儒附會之說也今倣周制為六部以戶部掌國計而司農猶為列卿贅矣况倉儲出納自昔太倉令王之益大司農之屬猶今之倉部也以列卿而行太倉今日惟倉部要東是聽位雖高勢出倉部下至於軍餉肅給罷於奔命世謂走卿辱矣

維下走也不敢謂辱而惟贅是羞又安能紀事乎
然堯舜在上聖政日新稽古建官將有取於斯云

司農少卿

歷代沿革

後魏 **北齊** 司農寺置少卿 **隋唐** 因

之宋 元豐正名置少卿為卿之貳

建炎三年省紹興四年復置司農卿少各一員

大元 大司農之下有少卿

擢貳農正 曲阜行韓正彥制 升亞

羣書要語

列卿之秩往司庶土之生茲為稷

官 胡文恭行司農少卿制

古今事實

賜絹數十匹

唐韋機拜少卿有宦者於苑中犯法機杖而後

奏高宗嗟賞賜絹數十匹

貯錢三十萬

韋機受詔檢校東都管田苑囿之事高宗謂之

曰官館隋代所造漸將摧毀頻欲修葺又費財

力如何機奏曰臣任司農向已十年前後省費

今見貯錢三十萬貫若以供葺理可不勞而就

也上大悅同上

責任甚重

國朝莫濟除少卿自禮部員外郎除魏杞奏曰
濟常中詞科且掌南宮牋奏恐議者以為蹊徑
未是上曰中都官不分清濁如司農責任亦甚
重以士人除授亦無害也濟尋奏久任責實詔
所論甚當國史

奏和糴沒官錢

李浩除少卿時朝廷和糴八百萬石而董事者
皆有憑恃賤糴惡濕以欺沒官錢戶部不敢詰
公視事即奏請下有司治大理附會戶部以支
為盤公力爭曰是非徒惠姦且虧軍食上是其
議言行錄

可嘉熊本

熊本判司農寺丞神宗曰熊本不傷財不害
民一旦去百年之患檄奏詳明可嘉也東都
事畧

親擢高夔

高夔字仲一上親擢為司農少卿倉地旱君始
梁空敷板米以是不腐周益公集

司農丞

歷代沿革

秦治粟內史有兩丞**漢**司農丞亦二人或謂之中丞平帝又置大司農部丞十三人人部一州勸農桑**後漢**司農丞一人部丞一人**魏****晉**因之銅印黃綬進賢一梁**冠宋****齊**以墨綬**唐**有六人掌判寺事少卿為卿貳而丞參領寺事**宋**新法行呂惠卿請始置司農寺丞一員以農田水利免役保甲等法付司農寺五年增置丞四員仍與簿輪出按察逐

州保甲元豐四年舒亶請止留丞一員餘並罷明年改制以司農舊職悉付戶部右曹而始循唐典正其秩職建炎三年詔罷司農寺紹興三年復置寺丞二員**大元**大司農司有司農丞

羣書要語

擢貳農正曲阜制大農事歸地官而丞事益簡宋城行李執制厚亦

自將其身蹈履繩檢擢丞農扈以試爾能張于湖行呂摺除農丞制

古今事實

給邊省運

漢耿壽昌爲大司農中丞奏設常平倉給北邊省轉運

管諸會計

桑洪羊爲大司農中丞管諸會計事 漢書

介通嚴恕

國朝葉顥字子昂謚正簡遷司農寺丞在朝三年非公事未嘗至丞相府樞密王綸知公恬退而未知其德性欲試以事一日官誥院失錦一端命公治之公請寬其慢藏之罪於是綸大喜謂其客曰葉寺丞介而嚴通而恕真重器也 楊

誠齋集

新編古今事文類聚卷之二十八

新集

新編古今事文類聚 八二十九

諸監部

新集

秘書監

歷代沿革

周外史掌四方之志三皇五帝之書
漢圖籍所在有石渠石室延閣

廣內貯之於外府又有御史中丞居殿中掌蘭臺秘書及麒麟天祿二閣藏之於內禁
後漢圖書古書在東觀桓帝始置秘書監一人掌典圖書古今文字考合同異屬太常以其掌圖書祕記故

曰秘書

魏

武帝初置秘書儀依御史臺又置秘

書令典尚書奏事

即中書令之任

文帝置中書

令而秘書改令為監以王象領秘書監撰皇覽

掌藝文圖籍之事初屬少府自王肅為監乃不

屬其蘭臺亦藏書籍而御史掌之

晉

武帝以秘

書併入中書省其秘書著作之局不廢惠帝復

別置秘書寺併統著作局掌三閣圖書自是秘

書之府始居於外

宋

齊

因之

梁

改為

秘書省

陳

及後漢亦以秘書與尚書中書門下集書為五

省

北齊

依魏制

後周

春官府置外史下大夫掌

書籍此秘書監之任也而秘監亦領著作監掌

國史

隋

秘書省領著作太史二曹後又改監為

令唐武德初改為監龍朔二年改秘書省為蘭

臺改監為太史天授初改秘書省為麟閣神龍

初復舊掌經籍圖書領著作太史二局通判省

事少監為之貳其後國史太史分為別曹而秘

書省主書寫校勘而已

宋

太平興國二年始建

崇文院昭文館史館集賢院皆摠為崇文院及

端拱初建秘閣

擇三館書籍真本并內出古畫

墨迹等藏之亦在崇文院中淳化元年詔秘閣

次三館祕書省仍隸京百司時祕書雖有監少
監丞郎校書郎正字著作郎佐皆以爲寄祿官
常帶出入祕監即今中大夫也即官至祕書監
有特令供職者有以他官兼領者有以判祕閣
官兼判者至道中宋以翰林學士承旨兼祕書
監淳化中李至目前執政以禮部侍郎兼祕書
監祥符九年楊億以祕書監判祕閣兼祕書省
事凡邦國經籍圖書悉歸祕閣而祕書所掌常
祭祀祝版而已兩朝國史志元豐正名以崇文
院爲祕書省既罷館職國初三館直館直校勘

通謂之館職必試而命不試而命者皆異恩盡
以三館職事歸祕書省置祕書省職事官自監
少至正字不領他局初除龍圖閣學士王勝
之爲祕書監時寄祿官已正議大夫蓋裕陵欲
重此選又勝之雅有文學故也監掌書籍圖史
天文曆數之事屬有五著作佐郎祕書校書正
字各以職隸於長貳惟日曆非編修官不預宣
和初改元豐之制增受爲十八員以倣唐登瀛
之數建炎三年罷紹興元年復置舊祕書省建
於禁中至是權寓臨安府法惠寺十四年朔新

省於大井巷之左五年立定十八人爲額太史局文德殿鍾漏所隸焉隆興元年詔監少丞外以七員爲額二年詔依祖宗舊法更不立額

大元

置祕書監掌經籍圖書領著作等局司天

臺隸焉其屬有祕書監祕書少監祕書丞校書

郎等員

羣書要語

孫伯壓司晉之典籍左傳又有承

明金馬著作之庭班固西都賦有

辟雍東觀蘭臺石室宣明鴻都之藏後漢儒林

序蘭臺祕書省置耳魚豢魏略御府祕書外府

也韓送鄭校理序祕監曰大蓬鄭氏談綺祕書

不是監以其職品清重非他監比也因話錄矧

上清之冊府侔方丈之仙瀛棧表類祕府藏書

雲委簡編之富瀛洲通籍朋來俊乂之游。拜

謁清都參華藏室。道家蓬萊重踐育材之地

。朱鸞素鵠羣翔於崑閬之庭神蕙丹芸列植

於雲霄之囿。神經祕牒猥窺東觀之書。乘

槎問漢敢忘意於英躔入館登瀛遽叨名於仙

籍。書局備負。入預書林。蘭臺金馬天祿

石渠既侔東壁二星之躔又曰上帝羣玉之府

○籤帶紛紜聚四部之學以充其內紳綏輝煥
擇一時之俊以游其間並同上謂當扣翠微而
排閭闔何為羞崑崙而薄蓬萊張于湖啓蓬島
獲窺於國史楊億代表芸香之職○自草紫泥
之詔遂違羣玉之峯並同上

詩句

綠編方委閣素簡日盈輕沈約並入紅蘭

署偏親白玉規

白樂天秘書何寂寂無乃羈英

豪

李白贈韋秘書暫阻蓬萊客終為大海人杜

甫寄題鄭秘監湖上

蓬萊漢閣連杜詩鴛鴦叨

雲閣麒麟帶玉除

杜贈才子八秘書

古今事考

仙室蓬觀

華嶠後漢書曰學者稱東觀為老氏藏室道家
蓬萊山在東觀經籍多蓬萊海中神山為仙府
幽經祕錄皆在焉又王融曲水詩記言事於蓬
觀謂藏室也

外臺內閣

太和中祕書丞薛夏嘗以公事移蘭臺蘭臺自
一臺也而祕書署耳謂夏為不得儀也推使當
有坐者夏報之曰蘭臺為外臺祕書為內閣臺

閣一也何不可相移之有蘭臺屈無以折自是之後遂以為常魏志王肅傳

祕府之室

漢以天下文籍悉在廣內祕府之室謂之祕書漢書

策府之山

穆天子西登崑崙見王母曰登已至于羣玉之山先王所謂策府也穆天子傳

稱曰麟室

唐藏書之地有昭文崇文之館有集賢書院有

修文弘文司文以至蓬萊書殿曰乾元修書院

曰祕書內外省曰內庫曰三館曰祕書祕府曰

蘭臺麟室六帖

改為麟臺

漢御史中丞在殿中掌蘭臺祕書圖籍唐以祕書省為蘭臺漢西京未央宮中有麒麟閣亦藏祕書即揚雄校書之處也唐改祕書為麟臺六典

故稱芸臺

芸香碎紙魚蠹故藏書臺稱芸臺魚豢典要

又

陳子昂集芸局都與見天下之圖

謂之木天

內諸司舍唯祕閣最宏壯穹窿高敞相傳謂之

木天同上

省多文士

後魏世祖欲用伊馥為尚書馥辭曰中祕二省多諸文士請參其次遂拜中護軍祕書監

書為中經

荀勗與張華依劉向別錄整治書籍亂者以為中經

十八學士

太宗為秦王銳意經籍於宮城之西門建文學館以待四方之士於是杜如晦房元齡等並以本官兼弘文館學圖其形狀上命褚亮為贊藏之書府故號十八學士時人謂之登瀛洲

四明狂客

賀知章授祕書監自號四明狂客及祕書外監稱其五絕

虞世南為祕書監太宗稱其五絕一德行二忠直三博學四文辭五書翰並唐書

謂之五絕

秘書省內有落星石薛少保畫鶴賀章監草書
郎餘令畫鳳相傳號為四絕元和中韓公武為
秘書郎挾彈中鶴一眼時謂之五絕職林

自撰竹書

荀勗領秘書監汲郡冢中得竹書勗自撰次經
傳闕文多所證明

自作石頌

西京秘書省廳事前有石頌星石隋自咸陽移署
於此王邵作瑞石頌以贊美之西京雜記

以為病坊

唐以望雖清雅而實非要劇權貴子弟及好利
誇侈者率不好此職以監為宰相病坊丞及著
作郎為尚書郎病坊秘書郎及著作佐郎為監
察御史病坊類要

以為登瀛

建炎南渡稍置館職紹興定制除監少丞外以
著作郎佐郎秘書郎校書正字通十二員為額
倣唐瀛洲十八學士之數容齋五筆

徑躋清要

秘書監其遷出他司非郎官即御史自乾道以

後有旨須曾任知縣始得除臺察曾任郡守始得為郎三館之士固無有歷此者於是朝廷欲越次擢用乃以為將作軍器少監既班在郎上則無所不可為欲徑躋清要者則由著廷祕郎而拜左右二史不然不過兼權省郎年歲間求一郡而去而御史之除皆歸六院矣同上

一見秘書

李邕見特進李矯自言讀書未徧願一見秘書假直秘書未幾辭去矯試問奧篇隱帙了辨如

響唐書

三八東觀

詔曰尚書矯體素弘簡文雅該通歷覽古今博聞多識著書實錄有良史之志轉為秘書監其加散騎常侍班同中書寺為內臺使中書散騎著作及治亂音律天文數術南省文章門下撰集皆典領之矯表謝云伏見詔書以臣為秘書加位常伯昔劉向父子世典史籍馬融通博三入東觀非臣膚淺所敢比迹華嶠集

圖籍博學

唐國朝已來有魏徵虞世南顏籀為秘書監設

官之重得賢之盛人到于今稱之以文學博雅
長圖籍長秘府白居易許貴同制自重其官自
遠其道思與虞顏為比同上

圖書養性

國朝真宗以揚徽之兼秘書監占謝便殿命坐
屏左右上勞問久之且曰圖書之府清靜無事
可以養性也

校定秘籍

魏證遷秘書監奏引學者校定四部書自是秘
府圖籍燦然畢備

參預朝政

魏證為秘書監參預朝政

談論規諷

虞世南為秘書監太宗引之談論及古今帝王
行政得失必存規諷太宗謂侍臣曰朕因暇日
每與世南商略古今朕有一言之善世南未嘗
不悅有一言之失未嘗不恨悵朕嘗戲作豔詩
世南進曰聖作雖工體制非雅上之所好下必
隨之此文一行恐致風靡不敢奉詔其懇誠若
此唐書

論議持正

世南已衰老屢乞骸骨不聽遷太子右庶子固辭改秘書監外若不勝衣而中抗烈論議持正太宗嘗出行有司請載副書以從帝曰虞世南在不使朕此行也世南薨帝曰石渠東觀之中無復人矣世南著北堂書抄盛行於代廣記

兼該詞學

太宗以顏師古體業淹和器用詳敏學該淹洽詞兼典麗命為秘書監

讚述符命

庾峻自司空長史轉秘書監出讚

符命天文

地理因有述焉

以文章召

歐陽脩以文章名冠天下景祐初召試為館閣

校勘東都事略

以文士直

李建中傳蘇易簡與太宗論文士因及建中太宗亦素知之命直昭文館

更迭補外

乾道元年二月詔館職所以招延天下之英俊

苟不親吏事知民情則將來何以備公卿之任
今後更迭補外孝宗會要

同在館閣

宋綬字公垂年十五召試中書真宗竒其文
聽於秘閣讀書久之召試學士院為集賢校理
與父郊同在世以為榮同上

賜飛帛書

太宗飛帛秘閣二字賜李至高宗賜御書右文
殿牌仍詔將作監米友仁書道山堂牌

賜紫章服

淳熙五年孝宗幸秘書省御製詩一首賜宰臣
史浩以下秘書監陳騏少監鄭丙賜紫章服

作白頭老

張齊賢改秘書監致仕嘗出謁其子曰昔賀秘
監以道士服東歸會稽大人盍衣羽服以優游
何必更事請謁齊賢曰吾且作白頭老監枕書
而眠何必學賀老作流沙之服時以為名言

勝枝頭乾

元祐初用治平故事命大臣薦士試館職一時
名士在館率論資考次遷未有越次進用者皆

有滯留之歎張文潛晁無咎俱在其間一日二人閱朝報見蘇子由自中書舍人除戶部侍郎無咎以為平緩曰子由此除不離核為如果之粘核者文潛曰豈不勝汝枝頭乾乎聞者皆大笑東北有李每熟不得摘輒便搗土人因取藏之故謂之枝頭乾並同上

舉其秀異

張舜明字芸叟元祐初司馬光舉舜明才氣秀直剛直敢言召試秘書校理東都事畧

稱曰遺逸

謝靈運為秘監秘閣之遺逸本朝實錄

宣明史籍

晉栢帝延熹二年初置秘書監溫嶠舉荀崧為秘書監曰國史之興將明得失之迹謂之實錄使一代之典煥然可觀散騎常侍崧文質彬彬思義通博歷位先朝泣事以穆宜掌祕與宣明史籍東觀漢記

刊正奇字

唐顏師古為秘書監專典刊正所有奇書難字衆所共惑隨疑剖析曲盡其源

刻置木偶

柳誓煬帝嗣位拜秘書監退朝之後便命入閣
言宴諷讀終日而罷帝每與嬪后對酒時逢興
會輒遣命之至與同榻共席恩若友朋帝猶恨
不能夜召於是命刻木偶人施關節能坐起拜
伏以象於誓帝每月下對酒輒令宮人置之於
座與相酬酢而為歡笑 按隋書作柳誓未詳誓
音辯

羸若枯藤

至道中賈黃中自澶州受代赴闕先豐碩雄壯
自是頓羸瘵鬱若枯藤上忝之拜禮部侍郎兼
秘書監以黃中素嗜文籍而秘府無事優之也

古今文集

雜著

代宰臣以下賀車駕幸祕書省表

呂伯恭

東觀書林久俟漢儀之覩西崑策府載瞻周馭
之臨嗣三紀之閑摹軼百王之盛節 中賀切以
斯文崇替與世降升自我祖宗嚴載籍萃藏之
地于時典冊踵乘輿游幸之書從容箴誨之求

廣大峻良之聚炎圖再造華省一新爰親御於
右文用仰繩於前武重明善繼太極丕承乙夜
牘陳念初載網羅之不易昕朝班入思中興儲
養之有原乃臨三館髦彥之躔乃展列聖圖書
之奧帝暉下矚光榮河溫洛之藏天藻昭垂跨
過沛橫汾之詠湛露示醇醲之惠承雲宣純繹
之音一日萬幾曾靡齋居之暇九流七略獨煩
清蹕之留蓋以恢稽古尚德之風夫豈爲飾治
樂成之舉聲明布濩慶澤汪洋恭惟 皇帝陛下
下秩叙邦經裁成王度多聞將求建事既惠顧
於簡編大享所以養賢復均盼於有醜士心興
起雅道流行臣等服在具僚身逢昌會第從臣
之頌敢揚厲於鴻休近天子之光請具宣於德
意

登秘書省閣詩序 楊盈川

若夫麒麟鳳凰之署三臺四部之經周王羣玉
之山漢帝蓬萊之室觀星文而攷南北大象入
於機衡披帝冊而質龍神負圖出於河洛司先
王之載籍掌制書之典謨劉向沉研揚雄寂寞
之士於茲翰墨馬融該博傅毅文章之才此焉

游處莫不出言斯善有道則尊黼黻其德行珪璋其事業心同匪石達人千載之交手握靈珠文士一都之會陶泓寡務油素多閑命蘭芷之君子坐芸香之祕閣徒觀其重欄四絕閣道三休紅梁紫柱金鋪玉礪平看日月唐都之物候可知坐望山川裴秀之輿圖在即虹蜺爲之回帶寒暑由其隔闕豈直崑崙十二瀛海千尋西州有百尺之樓東郭有千秋之觀于時五行金王八月秋分風生閭闔之門日在中衡之道煙雲悽慘白露下而四郊空林野蒼茫青天高而九州迫登山臨水無非宋王之詞高閣連雲有似安仁之興列芳饌命雕觴扼腕抵掌劇談戲笑假使神仙可得自茂松喬富貴在天終經許史間之以博奕申之以詠訶陶陶然樂在其中矣登高而賦羣公陳力於大夫聞善若驚下走自強於玄晏輕爲序引綴在辭章

館閣續題名記

張宦

上即位之五年實紹興改元歲在辛亥二月丙戌詔以多難未弭人才爲急其復秘書省直監若少監一人丞著作郎佐郎各一人校書正字

各二人以待四方雋傑之士又參酌舊制校書郎正字召試學士院而後命之自是採求闕文補綴漏逸而四庫書籍亦云略備矣越三載即秘書省復建史館以修神宗哲宗兩朝實錄選本省官兼檢討校勘官侍從官充修撰明年詔放唐十八學士之制監少丞外置著作佐郎祕書郎各二員校書郎正字通十二員立爲定額又明年移史館於省之側別爲一所以增重其事而校勘官或以他官兼之至紹興九年修徽宗皇帝實錄乃即史館開實錄院以本省官或他官兼檢討而修撰官如史館例明年未修正史詔罷史館併爲實錄院以正名實而著作局唯修纂日曆馬凡在茲選均謂之館職所以儲蓄英髦以備任使臺諫禁從於此乎取之故所除授纔十五六而員額之闕幾半蓋遴選也異日謀謨廟堂安社稷於談笑垂功名於竹帛者不無其人豈但摩研編削將以頌中興泳聖德爲太平之文飾而已哉宦材朽學落五年間再獲遺跡英游實與榮幸竊惟祖宗三館秘閣之制因革損益麟臺故事載之詳矣獨紹興以

來題名未有石刻則擢序之先後居職之久近
歲月遷改將無所攷於是作館閣續題名記且
使來者可述焉紹興一年七月記
古詩

和閣老舍人曝書會詩

錢穆父

天祿閣書府芸籤歲曝頻
備經窮藏室賜會集
儒紳顧陸高標好鍾王
妙入神司無槩俗吏來
預石渠賓

和秘閣曝書會詩

薛之奇

宴豆追儒雅簪纓成禮容
中天開壁府左海見
鼇峯漢簡陳三館湘圖
喚九重紫薇方思敏
吏筆能供

律詩

賀車駕幸秘書省二首

呂伯恭

麟臺高柳識雕輿共記中興幸
省初黃道再傳
天子蹕去月編重入史臣書
需雲下際君恩盛
晨露高張樂節舒
若寫鴻猷參大雅
定非周鼓頌
田漁

紫清丹極與天鄰
闔乾坤繫笑頰
獨爲斯文回一顧
坐令吾道重千鈞
先王舊物參差見
列聖明謨次第陳
墨客區區感榮遇
豈知深意在彝倫

恭和御製秋日幸秘書省近體詩

呂伯恭

麟閣龍旂日月章
中興再見赭袍光
仰觀焜燿人文盛
始識扶持德意長
功利從今卑管晏
浮華自昔陋盧王
顧將實學酬天造
敢效明河織

女

恭和御筆幸秘書省詩二首

周必大

羣玉西崑富典章
二星東壁燦輝光
秋光迎仗千叢麗
法曲傳觴九奏長
虎將縱觀脩舊事
豈冠倍侍仰明王
政脩即是攘戎策
撥狃殘祆豈足襄

蟠木離竒愧豫章
幾年封植荷恩光
石渠久綴英髦後
金鑕深慚學識長
御墨奎文瞻列聖
雷尊篆鼎備三王
願言作德酬榮遇
寧復矜才似智襄

送孫從之祕監歸朝供職

周必大

早看鷓鴣萬里風晚陪劔履大明宮誰知九郡
提封廣還許三年使事同我合掛冠尋舊隱君
當補袞用新功中興盛事人應說五紀吾邦四
少蓬

祕閣伴直

鄭谷

祕閣鎖書深牆南別晚岑吏人同野鹿庭木似
山林淺井寒蕪入迴廊疊蘚侵閑看薛稷鶴共
起五湖心

寄胡文定及劉恭父 朱元晦

先生去上芸香閣閣老新我豸角冠留取與人
卧空谷一川風月要人看

送胡文定祕閣供職 朱元晦

祖餞衣冠滿道周此行誰與話端由心知不作
功名計只為蒼生未敢休

東觀曝書會詩 孔常甫

書會青雲士來遊羣玉峯琅函窺一一金鑰發
重重

送鄒懷英 張孝祥

往昔千官班渠曾綴簪裾今者尺一追問津承
明廬蓬萊道家山紫極帝所居功名儻來爾步
武當徐徐

祕省後廳

白居易

槐花雨潤新秋地桐葉風飄欲夜天盡日後廳
無一事白頭老監枕書眠

戲酬盧秘書

王建

芸香閣裏人採摘御園春取此和仙藥猶治老
病身

呈袁祕監

劉克莊

近日頻聞有峻除人傳君相重師儒細旃坐穩
方輪講羣玉峯高未要扶別後曾過東閣否新
來已乞鑑湖無幾時供帳都門外真寫先生作
畫圖

偶作寄王秘書

齊己

七絲湘水秋深夜五字河邊日暮時借問秘書
郎此意靜彈高詠有誰知
詩話

詠石榴詩

孔紹安大業末爲監察御史時高祖爲沛討賊

於河東詔紹安監高祖之軍深見接遇及高祖受禪紹安自洛陽間行來奔高祖見之甚悅拜內史舍人時夏侯端亦嘗為御史監高祖軍先歸朝秘書監紹安因侍宴應詔詠石榴詩曰祗為時來晚開花不及春時人稱之

秘書少監

歷代沿革

隋煬帝置一人後又改為令**唐**龍朔中改為侍以神龍初復太極元年增少監為二員通判日事○**宋**初為寄祿

官元豆正名始實有職事初除葉均繼除孫覺皆一時選也掌貳書藉國史天文曆數之事○**大元**秘書監之下有秘書少監詳見秘書監沿革

羣書要語

還貳書省曲阜制豈惟典領圖籍為縉紳之榮庶以收集賢材增朝

廷之重同上

詩句

學蔚醇儒姿杜贈少監蘇源明文包舊史

善同上

秘書茂松意同上班秩兼通貴公侯出

異人杜寄李十五秘書

古今事實

儒素見稱

王紹宗秘書少監侍皇太子讀書紹宗性澹雅以儒素見稱朝廷之士咸仰慕之

才德兼茂

蕭德言年老請致仕太宗不許詔曰頃年已來天下無事方欲建禮作樂偃武修文卿年齒已衰教將何恃所冀才德兼茂卧振高風使濟南伏生復在於茲日關西孔子故顯於當今拜秘書少監

刊正書字

見前秘書監

刊是圖籍

韋繩天寶初入為秘書少監玄宗尚文視其職如尚書丞郎繩刊是圖籍以善稱職

父子並命

趙宗儒拜翰林學士時父驊遷秘書少監德宗欲寵其門一日並命

兄弟繼職

王珣為少監數年而弟瑑繼職

說臺閣典章

宋朝直秘閣曾幾謚文清入對上大悅以為秘書少監幾承平時已為是職每與同舍會說前輩言行臺閣典章從容竟日

修五朝大典

汪大猷字仲嘉除秘書少監當修神宗以來會要大猷猷率僚分纂上聞之為置局命宰臣提舉書奏五朝之大典始備樓攻媿集

具疏引古誼

上念孫逢吉父外嘗問孫某好士人召為秘書

少監上朝謁重華宮不以時公數具疏引古誼深言又率同館論奏同上

落筆如泉湧

王安中字履道自號初寮先生以文學知名有密薦於上者除著佐踰月蔡京召相見賓吏引入俄抵一室置几案筆硯有小黃門至云太師致意文字封呈啓之則某誥某詔若試西掖三題者履道落筆如泉湧閱三日內批除中書舍人遂改秘書少監

古今文集

雜著

辭免祕書少監兼權直學士院奏狀

周必大

冒應兼組增震孤衷切以貳職仙蓬攝官禁苑
俱為清選專用名儒伏念臣早誤聖知中歸農
畝八歲傾心於天日一朝稽首於軒墀辱臨遣
之温言將遄驅於暑路忽叨改命太過初心惟
舊學之素迂加比年之病志雖厚恩未報詎敢
忘魏闕之存然薄技無堪恐難寓禁林之直因
有令行而或反仰祈人欲之曲從

劉放祕書少監制

錢總

學者以東觀為老氏藏室道家蓬萊山而國家
所以涵養令器待才用者之宅也以爾放詞藝
之富回翔之久擢貳厥官益將試用

古詩

和孫莘老少監

黃山谷

上帝羣玉府道家蓬萊山延閣排霄起圖書擅
榮觀宮槐綠窻外岑絕非世間王度日修飭文
章麗朝班國器攻杞梓珎羣揜孔鸞中臺省符
移僚屬禮數寬品藻聞英鑒賞音發清彈儒林

數者舊少監髮新斑

和孫少監

黃山谷

道山鄰日月清樾深牖戶同舍多望郎閑官無
窘步少監巖壑姿宿昔廊廟具行趨補袞職黼
黻我王度

律詩

再任秘書少監

洪玉甫

再入蘭臺逢舊史重遊東觀閱新書家徒四壁
今無屋誰為君王奏子虛

寄孫少監

秦少游

天上圖書幾似舊人間歲月浪如馳鰲頭只在
蓬山伴行赴蟠桃熟後期

秘書丞

歷代沿革

魏武帝置秘書左右丞以劉放孫
資克之典尚書奏事後省**晉**以秘

書入中書謂之中書秘書丞惠帝又置秘書

丞**宋****齊**並一人**梁****陳**後**魏****北****齊**皆因之**後****周**

柳蚪為秘書丞時秘書雖領著作不參史事

因蚪為丞始令監掌**唐**龍朔二年改為蘭臺

大夫咸亨復舊掌府事勾稽省署抄目宋淳
化六年詔秘書監丞仍舊惟無定員及不專
職分蒞中外之任元豐正名始定為職事官
掌參領書籍國史天文歷數之事 ○大元
有秘書丞在秘書少監之下 詳見秘書監沿革

羣書要語

俄遷秘書丞司文天閣 文選褚淵

碑 秘府丞屬職任清華 初察除姚

宰制丞于秘丘 朝文恭制丞清聯於本省 陳藻
制進丞秘局 范徽之制

詩句 盛業光書 川微人盡國英 源乾曜和赴集

賢院宴詩 直事披一省重關秘七門 宋問之冬

夜寓直麟閣 縱欲抄前史負難遂此心 張縡秘

書伴直 莫將芸閣輕科第須作人間第一人 趙

嘏贈李秘書

古今事實

絳服墨綬

晉令秘書丞品第六銅印墨綬進賢一梁冠絳
朝服

銅印黃綬

梁增品第五秩六百石銅印黃綬

宜乘鹿車

祕書丞郎乘鹿車不得朝服失崇儒本意王肅
表論

若在雞羣

晉稽紹雅有文才山濤啓武帝可祕書郎帝曰
如卿所言乃堪爲丞何但郎也乃起家爲丞紹
始入洛或謂王戎曰昨於稠人中見紹昂昂然
若野鶴之在雞羣晉書

職近日月

魏王肅言祕書丞郎與博士議郎同職近日月
宜在三臺上祕書丞郎宜比尚書丞郎魏志

學徧古今

庾峻字山甫好學有才思轉遷祕書丞徧觀古
今聞見益廣王隱晉書

呼爲薛君

魏文帝與薛夏推論書傳未嘗不終日每呼之
不名謂之薛君並同上

繆以爲郎

何禎爲許都賦封上帝異之下公車特徵到用

為尚書郎詔用為秘書丞主者繆以為郎後月
餘禎關事上問曰吾本用禎為丞何故為郎案
主者罪遂為丞本傳

天水此丞

薛夏字宣聲天水人也博學有才文帝嘉其才
黃初中為秘書丞征東將軍曹休來朝時帝方
與夏有所咨論而休到帝引入坐定帝引夏出
謂休曰此君秘書丞天水薛宣聲也其見遇如
此

起家為丞

見前若在雞羣注

著書叙錄

後漢李彪遷秘書丞分領著撰事自元成帝已
來至於大和崔浩高允著述因書編年叙錄為
春秋之體創為紀傳表志之目焉

數奏文賦

嚴苞黃初中以高才入為秘書丞數奏文賦帝
異之魏略

王儉求校

王儉字仲實為秘書丞上表求校墳典依七略

撰七志四十卷獻之齊書

栢嗣知名

晉中興書栢嗣少知名初拜秘書丞遷秘書郎
宜得才人

魏文帝用何禎為秘書丞敕云此職宜得才人
魏志

處以清官

齊張率遷秘書丞高祖曰秘書丞天下清官東
南曾緒未有為之者今以相處為卿定名譽

曰第一官

梁劉孝綽除秘書丞武帝曰第一官尚且與第一人
惟得一人

隋姚察入為秘書丞文帝指謂朝臣曰聞姚察
學行當今無比我平陳惟得此一人
隋書

秘書郎

歷代沿革

後漢馬融為秘書郎詣東觀與校
書及魏武建國又置嘗以劉劭為

之出乘鹿車
掌中外三閣經書校閱脫誤
亦謂之郎中武帝分秘書圖籍為甲乙丙丁

四部定中外四部經書覆校闕遺正定脫誤
使秘書郎中四人各掌其一宋除中字齊因
之尤為美職皆為甲族起家之選待次入補
梁多以貴遊子弟為之陳著令令僕子起家
為之後魏置四人至北齊又增中字謂之郎
中隋祖諱中除中字唐分判校寫工程龍朔
中改為蘭臺郎咸亨復舊天授初曰麟臺郎
神龍初復舊唐秘書郎三人掌四部圖籍皆
有三本一曰正二曰副三曰貯宋初為寄祿
官元豐正名始有職掌判寫分貯集賢院史
館昭文館秘閣經籍則秘書郎主之元祐四
年秘書郎並除陞朝知縣已上資序人任滿
除集賢校理紹聖初罷校理○大元亦置秘
書郎之職

羣書要語

發秘府覽書林

揚雄劇奏美新論

校理則用天下之名士能文學者

韓文

或解巾

以司讎校

或決科

而登館殿

權德

輿廳壁記

圖籍之府命汝為郎

白樂天制

持三

寸筆終入芸香之閣

陳子昂集

石渠司籍陳希

烈制身登三閣

陸機謝表

秘書郎掌中外三閣

秘書也○延寘冊府初寮除孫近制職清秩美

南豐擬制

詩句蓬山振雄筆李白上君白玉堂杜甫飛騰

知有策意度不無伸杜寄十五秘書漸階羣振

鷺入學詣螟蛉韓愈答張秘書清省宜寒夜仙

才稱獨吟喻坦之和范秘書省中詩君詩多態

度藹藹春空雲東野動驚俗天葩吐奇芬張籍

學古淡軒鶴避雞羣韓醉贈張秘書靡燕與丹

桂奇心復奇骨已蔽蒼龍門又影鳳凰闕吳均

增柳秘書

古今事實

典校秘書

後漢馬融有俊才為秘書郎詣東觀典校秘書
時儒士以為文德可興武功宜廢遂寢蒐狩之
禮戰陳之法融上廣成頌以諷諫忤旨滯於東
觀十年不得調後在東觀著述馬融才高博洽
為世通儒

審正圖籍

後魏高謐字安平有文武才度天安中以功臣
子召入禁中除秘書郎專典祕閣謐以墳典殘

闕奏廣訪郡邑大加繕寫由是圖籍稍以審正
專精學問

司馬彪少篤學不倦不交人事專精學問泰始
中為秘書郎又轉為丞虞預晉書

徧觀圖籍

張纘字伯緒為秘書郎因求不遷欲徧觀閣內
圖籍晉書

思三都賦

左思專思三都賦自以所見不博求為秘書郎
同上

博十年學

竇威授秘書郎不肯調者十年其學益博

弱冠齊名

王謐弱冠有美譽與王綏齊名除秘書郎晉中
興書

別駕後名

魏王基字伯與黃初中察孝廉除郎中時青土
初定刺史王凌特表請基為別駕後召為秘書
郎凌復請還頃之司徒王朗辟基凌不遣朗書
劾州曰凡家臣之良則升于公輔公臣之良則

入於王職是故古者侯伯有貢士之禮今州取宿衛之臣留秘閣之吏所希聞也

五歲見奇

魏鍾會字士季少敏惠夙成中護軍蔣濟著論謂觀其眸子足以知人會生五歲濟濟見者奇之正始中為秘書郎

十五對策

王承字安期七歲通易選補國子生十五對策高帝除秘書郎中

有限有競

王敬弘子恢之為秘書郎敬弘求為奉朝請與恢之書曰秘書有限故有競朝請無限故無競吾欲處汝無競之地於是文帝許之宋書

不清不要

李素立武德初以親喪解官起授七品清要有司擬雍州司戶參軍帝曰要而不清復擬秘書郎帝曰清而不要

朱紫今別

鄭默為秘書郎刪省舊文除其浮穢著魏中經時中書令虞崧曰而今後朱紫別矣王隱晉書

簡素不同

蕭惠開家雖貴戚而車服簡素初為秘書郎秘書著作並名家年少惠開意趣與之多不同比肩或三年不共語沈約宋書

宋袁制衣詩

宋袁勤學好屬文在陳時釋褐為秘書郎嘗製千字詩當時以為盛作陳後主聞名入禁中使為月賦袁染翰立成後主曰觀謝希逸不能獨美於前矣又使為芝草嘉蓮二頌深見賞重

上官視草

唐上官儀遷秘書郎太宗每屬文遣儀視草工詩人謂之上官體

休沐誦書

任敬為秘書郎每休沐合門誦書

元日奏頌

唐岑文本除秘書郎元日奏籍田三元頌文致華贍

率同館奏

國朝彭忠肅公龜年除秘書郎時傳召姜特立公白丞相留公恐非虛傳既而果然公引李絳

事求退公率同館論奏且勉樞廷爭之遂寢樓
攻集

久次秘書

秘書張闡忠肅公時秦檜用事每除臺諫必以其耳目知闡久次喜論事一日微諷闡謂當入臺闡曰丞相苟見知老死秘書足矣檜默然由是罷去

古今文集

雜著

秘書郎壁記

權德輿

按六典秘書郎四人從六品上分掌四部書以甲乙丙丁為之目昔漢武帝聚天下文籍於廣內謂之中秘書魏晉之際祕書與中書或分或合故云職近日月宜居三臺之上丞郎之位與南宮相亞歷代辯論與時輕重國初思漢庭延閣之制薄江左貴遊之選始以岑江陵虞永興褚河南迭為之厥後彬彬多文學之士然則先王之法志官師之訓典九流百代如貫珠然學與仕皆優而旋相為用者其在茲乎今年春榮陽鄭君具瞻自涇陽尉承詔授任鄭君質重而

有敏行坦夷而含明識且今中書相君之令弟也方以結綬滿歲調於選部言吏資者積三遷而後至今超居之有以見申恩審官與怡怡綽綽之道爲盡美矣在晉鄭默領中外三閣始刪煩文而朱紫不雜開元初君之王考頴川府君叔祖刑部府君皆繇禮官博士繼登其任諸父諸兄或解巾以司讎校或功次而奉朝請含章筮仕多在於斯猶栢公武公之代爲卿士蓋善於其職而宜之之義也謂鄙人嘗學舊史能知書府官業之所繇是俾編次郎位彰施屋壁時

貞元庚辰秋七月記

辭免秘書郎狀

朱元晦

聞命震驚罔知所措切以聖主寤寐俊傑圖起事功片善寸長靡不收用若穴幽隱亦弗弃遺遂使妄庸有此遭遇恩德隆重捧戴難勝豈敢飾詞遜避以孤獎拔之意然熹竊惟國家開建圖書之府所以儲蓄秀異之才選試有程未始輕授郎以奉守爲職雖異典校之官然自昔相承或用以處老成耆德之士如熹凡陋豈所克堪今若貪冒寵榮不自量度此必坐取嘲笑以

累聖主知人之明又况頃年屢以多病不才懇
辭召命已蒙聖慈洞照肺腑蓋既憐其愛君憂
國粗有畎畝夙夜之誠而又知其衰朽無庸重
閔勞以官職之事故凡所以假借褒嘉惠養全
活之意雖非愚賤之所當得然天地父母委曲
生成之恩則有不可以終辭者此熹所以懇辭
踰年而卒拜明命且復具以此意附奏陳謝其
所以感恩自誓之誠蓋有皦然而不可欺者今
乃欲因聖主前日所以假借惠養之資而遂冀
緣以冒進擢無涯之寵則是古人所謂登龍斷
而左右望以罔市利者不惟士夫清議有所不
貸而熹之不肖亦竊羞之是以恐懼回皇不敢
祇受

校書郎

歷代沿革

漢之蘭臺及**後漢**東觀皆藏書之

室當時文學之士使讎校於其中

故有校書之職初漢成帝已命光祿大夫劉

向於天祿閣校經傳諸子詩賦步兵校尉任

宋校兵書太史令尹咸校數術太醫監李柱

國校方伎後以諸大夫楊雄等亦典校於其中又選他官入東觀皆令典校秘書或撰述傳記蓋有校書之任而未為官也故以郎居其任則謂之校書郎明帝召班固謂校書郎除蘭臺令史後遷為郎典校秘書又劉瓛與校書郎劉駒駘馬融校定東觀五經傳記百家藝術整齊脫誤校正文字又楊終徵詣蘭臺拜校書郎竇章為東觀校書郎以郎中居其任則謂之校書郎中後漢蔡邕拜郎中校書東觀又馬融為校書郎中請東觀典校秘

詩句 盃脫校書郎 武后時人 風流半刺史清絕

校書郎 東坡 擁書天祿閣奇字校偏傍 王荆公

詩並入紅蘭省偏親白玉規 蓋為校書郎也元

集酬樂天 才子富文華校讎天祿閣 韓送鄭校

理校書著作頻召除猶能正車問何如 黃山谷

卷裏詩過一千首白頭來作校書郎 白居易與

王建 終朝守玉署方夜旁石扉 劉孝綽校書祕

書省雪夜詠懷校文在仙掖每有滄洲心 儲光

義酬綦校書忽從被褐中召入承明宮 盧象贈

程校書

青藜照書

劉向校書天祿閣夜有老人植青藜杖杖端出火以照向日我是太乙之精天帝聞卯金之姓有博學者下而觀焉拾遺記

白虎考論

東漢楊終顯宗時拜校書郎上言宣帝論定五經於石渠閣今宜如故事於是招諸儒於白虎觀考論異同

詔領祕書

前漢劉向字子政遷光祿大夫而上方精於詩書觀古文詔向領校中祕書本傳

賜副祕書

瑛游與劉向校祕書每奏事游以選受詔進讀羣書上器其能賜以祕書之副同上

神童校書

楊炯幼聰敏博學善屬文神童舉拜校書郎

進士中補

白居易敏晤絕人擢進士拔萃皆中補校書郎

唐書

講究傳記

劉歆與父向領校秘書講六藝傳記諸子無所不究

窮覽典籍

東漢馬融拜校書郎中在東觀十年窮覽典籍上廣成頌漢書

整齊脫誤

劉瓛永初中鄧太后詔與五經博士校定東觀五經諸子傳記百家藝術整齊脫誤定正文字

校閱書籍

段成式以蔭官入為校書郎研精苦學秘閣書籍校閱皆遍

可比衛公

孔季翊初擢制科授校書郎陳子昂稱其神清韻遠可比衛公並唐書

可為國器

房元齡校讎秘書省高孝基謂裴矩曰僕觀人多矣未有如此郎者當為國器但悵恨不見其聳壑昂霄唐書

畫像勸學

高麗校書東觀後遷內黃令帝勅同僚臨祖送於上東門詔東觀畫處以勸學者東漢書

騎驢詠詩

開元中校書正字俸祿微少孤寒英傑者居之或有不辨正字乘驢入省時有語曰正字校書詠詩騎驢詳見太社令

作神雀頌

賈逵自童兒常在太學諸儒爲之語曰問事不休賈長頭顯宗時有神雀集宮殿官府帝勅蘭臺給筆札使作神雀頌拜爲郎與班固並校書應對左右

作顯宗頌

傳毅字武仲肅宗召文雅之士以毅爲蘭臺令史拜郎中與班固賈逵共典校書毅追美孝明帝功德最盛而廟頌未立乃依清廟作顯宗頌十篇奏之由是文雅顯于朝廷並同上

以賞盡言

鄭鑑字自明試館職上問今合除何官龔茂良對曰前此學官召試往往止除正字上曰可除校書郎賞其盡言因曰策中所言或是或非大

率剴切不易

以非急務

後漢盧植在東觀校中書帝以非急務轉為侍
中

求正六經

後漢蔡邕拜郎中校書東觀以去聖久遠文字
多繆乃求正定六經文字自書冊於碑始立摹
寫者車乘日千餘兩

疏論大將

國朝張公闡字大猷為校書郎時諸大將恃功
邀爵賞又論禁衛單寡公上疏極論之厥後稍
進退諸將召諸道兵補三衙闕額往往符公言
周益公集

為復禮卿

唐徐岱於學無所不通辨論明銳座人常屈大
曆中劉晏表為校書郎觀察使李栖筠欽其賢
署所居為復禮鄉名達於朝

號盃脫郎

唐武后時官濫人謠曰補闕連車載拾遺和斗
量擢推侍御史盃脫校書郎通鑑

未嘗一至門

陳公輔自國佐除校書郎公初入館閣時蔡京王黼當國無所附麗未嘗一至門言行錄

未嘗詣執政

陳正獻公俊卿以秘書省校書郎召非公事未嘗詣執政揚誠齋文

屏事益讀書

王文定公准為校書郎既入館屏去人事益讀未見書休假亦入抵暮始歸樓攻媿集

安分不介意

注莊敏公澈遷校書郎安分無求視同舍郎數遷殊不介意周益公集

古今文集

雜著

送鄭涵校理序

韓愈

秘書御府也天子始更聚書集賢殿別置校讎官曰學士曰校理常以寵丞相為大學士其他學士皆達官也校理則用天下之名能文學者苟在選不計其秩次由是集賢之書盛積盡秘書所有不能處其半書日益多官日益重四年

鄭生涵始以長安尉選為校理人皆曰是宰相
子能恭儉守教訓好古義施於文辭者如是而
在選公卿士大夫家選之子弟其勸耳矣愈事相
公三為屬吏今生始進仕獲重語於天下而慊
慊若不足真能守其家法矣
古詩

題登瀛圖

韓子蒼

咸平中天開帝居羣公下直承明廬韓侯畫此
時元虞瀛州仙人樂有餘我生不及正觀初却
恨十年身校書吟詩天街騎蹇驢爾來戎馬爭
馳駟把卷未展先歎歎

送李校書

杜甫

李舟名父子清峻流輩伯人間好妙年不必須
白晳十五富文史十八足賓客十九授校書二
十聲輝赫

題李白畫像

韓子蒼

玉堂學士今劉向禁直岩堯九天上不須對此
融心神會植青藜夜相訪

聞富李申遷校書郎作

晁以道

小富從來慰所望青衫叙進校書郎相公勲業
久彌著孫子門闌漸有光莫話詩過已埋沒且
非益脫得分張
律詩

送吉校書東歸

司空曙

少年芸閣吏罷直暫歸休獨與親知別行逢江
海秋聽猿看楚岫隨鴈到吳洲處處園林好何
人待子猷

代秘書贈弘文館諸校書

李商隱

清切曹司近玉除比來秋興復何如崇文館裏
丹霜後無限紅梨憶校書

和寄韋校書

陸龜蒙

萬古風煙滿故都清才搜括妙無餘可中寄與
芸香客便是江南地里書

酬韋校書

薛濤

芸香誤比荆山玉那似登科甲乙年澹拖鮮風
將綺思飄花散縹媚青天

寄子先校書

黃山谷

我觀李校書超邁有古風談道屢入微閉門長

高蓬

答張徹校書

韓退之

清墨竄舊史磨丹注前經義苑手秘寶文堂耳
驚霆

寄黃魯直校書

賀方回

材如杞梓各稱良海內知名獨豫章終歲且留
天祿閣入看應號紫薇郎

新編古今事文類聚卷之二十九

新集

新編古今事文類聚卷之三十

新集

諸監部

著作郎

隸秘書監

歷代沿革

著作郎周左史之任也漢東京圖書悉在東觀故使名儒碩學人直

東觀撰述國史謂之著作東觀皆以佗官領
焉蓋有著作之任而未為官員也魏明帝太
和中始置著作郎官隸中書省專掌國史
觀以侍中尚書典著作後又置佐著作郎亦

屬中書晉秘書監自調補之太元四年詔秘書無監使吏部選佐著作郎有監復舊又閻纂集云鄒湛謂秘書監和嶠曰閻纂可佐著作嶠曰此職閑重勢貴多爭不暇求才按此則大著作亦監自調元康詔曰著作舊屬中書今秘書既典文籍宜改中書著作為秘書著作於是改隸秘書後別自置省謂之著作省而猶隸秘書著作郎一人謂之大著作專掌史任李充為大著作又荀勗以中書監孫盛以秘書監並領為著作孫綽以散騎常侍

及陳壽並為大著作佐著作郎始到職必撰

名臣傳一人宋初廢其制宋齊以來遷佐於

下謂之著作佐郎亦董國史集注起居梁初

周捨裴子野皆以他官領其職與大著作同

陳為令僕子起家之選後周屬春官之外史

隋秘書省又領著作曹郎二人佐郎八人又

有秘書正字之官唐為著作局亦屬秘書省

掌撰碑誌祝文祭文與佐郎分判局事龍朔

改著作郎為司文郎中佐郎為司文郎咸亨

復舊初著作郎掌修國史佐郎貳之徒有撰

史之名而實無其任盡在史館其屬官有校書郎正字宋以寄祿官元豐正名始實有職掌修纂日曆祭祀祝辭則著作郎佐之初除林希為大著豐稷為小著皆一時選也

大元因唐制為著作局有著作郎著作佐郎亦隸于秘書監

羣書要語

承明金馬著作之庭大雅宏達於茲為羣元元本本殫見洽聞啓發

篇章校理秘文

班固西都賦

臣藝不傳古學謝

專家之懷鉉之念慚夢腸之術謬勒斷蛇之符

預刊冰河之業珥筆史觀記言文符梁沈約謝

著作表掌東觀陽秋之重唐大詔令地居華省

職在修文六帖漢用史才任先班固晉推經

術選在李充漢推良史選在孟堅晉重名

儒任先弘度並六帖執簡東觀後漢補志序東

觀著述杜牧制著作乃論撰之地唯才史是居

唐著作表書笏珥彤記言事於仙室文選左右

史記言動之詳宰臣記時政之要以授東觀會

而成書栾城黃庭堅制蘭臺東觀實專撰述初

寮制擢居著撰之局胡文恭行制領著作於秘

丘王璟制入著秘局周約制

詩句 夫子靜且直雍容時卷舒東坡送岑著作

詩華蓋熒煌天帝座蓬萊縹渺道家山彭汝礪

次韻履中學士詩

古今事實

直筆東觀

北齊天保二年詔中書令兼著作郎魏收撰後
魏史初帝令羣臣各言志收曰臣願得直筆東
觀早出魏書故帝使專其任北史

著作東觀

蘭臺令史班固傳毅洛陽令陳崇長陵令尹敏
司隸校尉孟冀及楊彪等並著作東觀漢書

採撫前記

班固典秘書採撫前記綴緝所聞以為漢書

博習舊聞

揚彪字文先少傳家學熹平中以博習舊聞召
拜議郎與馬日磾盧植蔡邕等著作東觀同上

五葉著作

自司隸校尉奉至臣父五葉著作不絕鄉族以
為美談應亨謝表

三世繼為

崔駰三世相繼其後無聞若乃談遷接武彪固踵跡亦各一世之良同上

有史才遷

謝沉為祠部郎何充庾冰以沉有史才遷大著作

為文士冠

晉孫綽為廷尉卿領著作綽少以文才稱于時文士綽為之冠

謂之館閣

北齊著作隸秘書謂之史閣亦謂之史館邢子才作詩酬魏牧冬夜直史館是也

甚有清才

王焜

著作郎甚有清才

請議限斷

陸士衡以文學為秘書監虞濬所請為著作郎議晉書限斷晉史

衰次興衰

蕭德言歷著作郎太宗詔魏證虞世南褚亮及德言衰次經史百氏帝王所以興衰者帝曰使

我稽古臨事不惑者公等力也

面折僚友

隋劉禪之父于翼字小心為著作郎峭直有行
嘗面折僚友短退無餘訾李百藥曰于翼言人
多不憾

謂成門戶

唐許敬宗除著作郎謂所親曰仕宦不為著作
無以成門戶唐書

撰百家類

唐孔至歷著作郎明氏族學與韋述蕭穎士柳

冲齊名撰百家類例以張說等為近世新族刻
去之說子均方有寵怒曰天下族姓何預若事
而妄紛紛者耶均弟素善至以實告初書成示
韋述謂可傳及聞均語懼欲更增損曰大丈夫
奮筆成一家書柰何因人動搖有死不可改遂
罷

料四部書

晉孝武帝好覽文藝敕著作郎徐廣料秘閣四
部見書凡三萬六千卷續晉陽秋

上明堂賦

唐劉允濟奏上明堂賦以諷則天甚嘉歎之拜
著作郎

作應難篇

張瞻字仲應作應難篇司空張華晚見稱善命
為著作郎 王隱晉書

作者舊傳

陳封作益部耆舊傳武帝善之命為著作郎

造乘輿箴

潘尼轉著作郎造乘輿箴

作劔閣銘

晉張載字孟陽作濛汜賦太僕傳玄見其賦歎
息以車迎載言談盡日載遂作賦起家徵為著
作郎又作劔閣銘世以為能除著作郎

因定禮儀

謁者僕射劉珍校書郎劉駒駘等因著作東觀
撰集漢記因定漢家禮儀上言請張衡參定後
漢書

刪除典籍

李充為大著作于時典籍混亂充刪除煩亂以
類相從分為四部秘閣以為永制 臧榮緒晉書

老有士望

宋朝楊龜山在著庭具敏之等李綱併以公姓名納上前曰時亦老儒有士望可令閣門候對班尋召對論當世急務上喜遂擢用之

吳敏手錄

顧義自守

張耒字文潛從蘇軾學轍見其文愛之蘇軾亦深知之稱其文汪洋澹泊有一唱三歎之聲元祐初為著作佐郎改著作郎在館八年顧義自守泊如也

東都事略

才謝呂望

程駿拜著作郎後魏獻文帝屢引駿與論易老之義顧謂羣臣曰朕與此人言意甚開暢又問駿年幾何對曰六十有一獻文曰昔太公既老而遭文王今卿遇朕豈非早也駿曰臣雖才謝呂望而陛下尊過西伯覲天假餘年竭六韜之効

徒取班馬

韓顯宗除著作郎高祖曾謂顯宗之才朕自委悉中省之品卿等所聞若欲取古人班馬之徒固自遼闊若欲求之當代之能卿等應推崔孝

伯北史

姝母著郎

宋何承天除著作郎時已老而諸佐郎並名家
年少荀伯子嘲之常呼為姝母承天曰卿當云
鳳凰將九子何言姝母談藪

上車著作

梁朝全盛時貴遊子弟多無學術諺云上車不
落即著作起居何如即校書家訓

非軾不可

神宗與宰執議更官制至著作郎則曰非蘇軾

不可 王鞏聞見錄

引駿與論

見前程駿故事

古今文集

雜著

著作郎廳壁記

李華

化成天下莫尚乎文文之大司是為國史職在
褒貶懲勸區別昏明故駟牧頌於魯侯祈招諷
於楚子史官之任有述作焉蓋王者之元符生
人之極教也昔沮誦蒼頡為黃帝史臣文字以

異其來尚矣其南正北正建于顓頊羲氏和氏
命于唐堯更虞夏商代序天地周官宗伯之屬
有太史正歲年以序事小史奠系代辨昭穆內
史受納訪以詔王聽理外史達書名于四方前
志所載有左史記事或箴王之闕或司過于朝
所典不同其納君於善一也傳曰天子有日官
則史逸史伯是也諸侯有日御則禘竈子韋是
也倚相在楚南史在齊董狐在晉邦之司直也
其事舉則三靈不慝其政息則百度惟危故先
王貴之至于漢廷參用周禮太史公既沒其子
遷緘金匱石室之文焉降及東京永平中特詔
班固著作東觀繼其事者楊彪蔡邕由是太史
但掌天文律曆而已小雅寢周聖人生魯道尊
而文武將墜德至而天地不通感於獲麟嘆於
與蜡爰制國典丘明傳之因曆象以正時元假
鬼神而討有罪善人勸焉淫人懼焉百代之英
所由用也向若前代闕能文之史曠記事之官
雖舜禹之烈無聞焉有國有家何以直道而行
也魏太和年肇以著作名官爲中書屬晉元康
年改隸秘書朝服單衣介憤始親職必撰名臣

傳歷宋齊梁陳官品第六元魏高齊周隋秩從
五品魏則王沉以侍中兼之衛覬以尚書帶之
至于有晉若史才之美陳壽自佐郎遷元舅之
尊庾亮以中書領宋則徐爰何承天齊則沈約
裴子野梁則陸雲公姚察陳則顧野王張正見
後魏則崔光高允北齊則邢子才魏收周則蘇
亮柳蚪隋則虞綽王邵皆一朝名選也貞觀初
詔梁文昭公鄭文貞公統英儒盛才修五代史
天子親垂筆削與春秋合符魏魏乎史氏之光
擢也因是開館於內別立史官多以著作郎領
帶其職而舊司所掌唯碑誌祭祝之文在焉然
以其能綜羣言且居百乘出典下國轉爲郎官
經緯斯文昭宣有政或上遷秘書少監或擢拜
中書舍人固不功其任也天命元聖降而爲唐
唐之建官固非後又若虞永興德函大雅魏侍
中才高王佐鄭吏部絕韻鏘鳴崔司業雄詞飛
動皆歷焉今上兼帝王之極功摠文武之能事
思所以比崇軒皞紹美唐虞潤色乎大猷發明
乎皇道問誰獻箴則賓客崔氏問誰執簡則恒
傳吳公胡諭德遊刃詩騷韋庶子貫珠今古濟

濟多士時惟秉文盛矣哉國風乎雅頌也名嶽
已遷別封天柱舊章不改尚列周官登陟蓬萊
之峯循環藏室之奧從容簡貴信君子保明弘
道之司歟今大著作清河崔公名傑天寶三載
自秘書郎拜閱天祿之圖書踐人文之苑囿澡
身於三德研慮於六經執謙而光好善能擇惠
風吟於秀木朗月鏡於安流代爲元臣家曰茂
緒壯宮室者必鄧林之條榦乎以儒雅之姿從
班蔡之後揮綽令譽達于清朝則百祿隨之曷
其有極矣先是命官之記不列于齊以華職忝
末班與聞前志拜命之辱敢叙官之守云時天
寶七載二月辛亥記

雙槿樹賦

盧照隣同崔少監作

賦曰方丈蓬萊邈矣悠哉芸局石室圖天揆日
地則圖書之府人則神仙之靈中有芳華鬱鬱
亭亭兩砌分植雙階並耀葉鏤五衢榮分四照
青陸至而鶯啼朱陽升而花笑紫蒂紅蕤玉藥
蒼枝露華的皪風色徘徊寂寞條利棲閑此地
委命卷舒隨時榮頽外無嬰天之禍內有逍遙
之致則有亭伯儒門令思詩友翰苑擴其吞夢

文鋒高而照斗
律詩

送王龜齡自著作丞外補

洪邁

不柰諸公厭石渠年年送客意何如直言飽誦
劉菁策太息亟傳賈誼書今日朝廷唯主聖異
時風俗要人鉏須君早晚歸遺補莫戀玉門久
曳裾

著作佐郎

歷代沿革

同前著作郎沿革

羣書要語

著作有局本隸修書胡文恭行范
道卿制著作局有佐隸修書之任故

事到職作名臣之傳宋敏求制領佐史筵高師

說制遷秘立撰著之佐宋迪制書省有佐孫諮

制佐修書筵張子方制並胡文恭行佐著東觀

公是行李謹修制佐麟臺之著撰命佐選於

道山並牋表類蘭臺佐撰王禹玉制

詩句子亦東南珍價重不可筭東坡送孫著作

古今事實

學行清修

晉陵朱鳳吳郡吳震並學行清修白首衡門老而未調譚為監知有史才薦之為著作佐郎並稱其職

晉華譚傳

聲姿清亮

後魏宋弁字義和為佐郎高祖孝文帝曾因朝會歷訪治道弁年少官微自下而對聲姿清亮進止可觀高祖稱善者久之由是大被知遇賜名為弁意取弁和獻玉楚王不知寶之理

為文華婉

崔融授著作佐郎為文華婉

極學清選

唐王義方曰臣去歲冬初雲陽下縣丞耳今春及夏陛下授臣著作佐郎極文學之清選

作南郊賦

郭璞作南郊賦獻帝嘉其才拜著作佐郎

撰西觀書

晉束皙字廣微博學多聞晚應司空辟月餘除著作佐郎西觀撰晉書草創三帝紀十志遷博

士著作如故

賦懽喜詩

唐杜審言武后召之賦懽喜詩即授佐郎

作濛汜賦

晉張載字孟陽作濛汜賦傅玄見而嗟歎以車

迎之言談盡日為之延譽遂知名起家著作佐

郎

才堪著作

晉閻續字續伯祭酒鄒湛以續才堪著作薦於

秘書監華嶠嶠曰此職閑廩貴重勢多爭之不

暇求其才遂不能用

書善著述

陳壽善著述除著作佐郎時夏侯湛等多欲作

魏書見壽所作即壞已書張華別傳

并召賜緋

唐陽城以著作佐郎召并賜緋魚

知遇賜名

見前宋并故事

兼修國史

敬播再遷著作佐郎兼修國史從太宗伐高麗

帝名所戰山為駐蹕譜謂人曰鑿與不復東矣
已而果然

為後春秋

劉元濟累遷著作佐郎宋魯哀公後十二世接
戰國為魯後春秋並唐書

校勘館圖

宋朝王存少有立志為小官修潔自重為歐陽
公所知趙康靖康公薦召試擢秘書省著作佐
郎館閣校勘校集賢院書籍言行錄

久在館閣

乾道三年七月梁克家奏曰著作佐郎劉焯久
在館閣以拘資格除郎不行乞稍遷遂除會要

文學知名

王安中字履道自號初寮先生政和中以文學
知名除宗學博士有密薦於上者除著作佐郎
才學世家

李邴字漢老伯父昭圻字成季元祐名士與晁
張為徒嘗為柱史邴才學能世其家政和末除
書局遷著作佐郎並同上

十年不調

後周黎景熙正定古今文字於東閣大統末拜
佐郎於時倫輩皆倍兼常伯車服華盛惟景熙
獨以貧素居之而無愧色又勤於職然性尤專
固不合於時是以一為史官遂十年不調

三十方為

謝裕時會稽王世子元顥嬖人張法順權傾一
時內外無不造門唯謝裕不至年三十而方為
著作佐郎

不為今吏

晉武帝欲以郭琦為佐著作郎問尚書郭璋璋
憎琦不附已答云不識帝曰若如卿言烏九家
兒能事卿即堪郎矣及趙王倫篡又欲用琦琦
曰我已為武帝吏不能復為今世吏終於家

與免遠官

嘉祐八年詔以秘書省著作佐郎安壽嘗中進
士第三人與免遠官今後以為例矣

司天臺

少昊氏

以鳥名官鳳鳥氏為歷正

歷代沿革

注

鳳凰知天時故以名歷正之官

高陽氏命南正重司天**唐堯**命羲和以閏月

定四時成歲曆象日月星辰敬授人時夏有

羲和之官**三代**各有太史**周**有馮相氏掌十

有二歲十有二月十有二辰十日二十有八

星之位保章氏掌天星以志星辰日月之變

動以星土辨九州之地所封封域分星觀妖

祥以五雲之物辨吉凶水旱以十有二風察

天地之和**秦**有太史**秦漢**以來太史之任兼

成周太史馮相保章三職**漢**司馬談父子相

繼為太史令遷云文史星曆近乎卜祝至宣

帝時修撰之職以他官領之於是太史之官

唯知占候而已自古太史之職雖以著述為

宗而兼掌曆象日月陰陽氣數司馬遷既沒

後之續史記者褚先生劉向馮商楊雄之徒

並以別職來知史務於是太史之署非復記

言之司故張衡單颺王立高堂隆等其當官

見稱惟知占候而已故**後漢**太史令掌天時

星曆而不及史掌**晉**太史令品第七**宋**以

它官兼領高瑩以侍中陳卓以義熙守吳道

欣以殿中侍御史兼領**宋**有日觀即司天臺

也齊梁陳並置隋秘書省太史曹置令二人
煬帝改曹為監唐因之武德改為太史局龍
朔改秘書閣局光宅改渾天監其令監置一
人正五品又加副監及丞主簿府史等員其
年又改為渾儀監長安二年復為局監依舊
為令景龍二年又改局為監令名不改開元
二年又改令為監其下一員改為少監肅宗
改為司天臺掌察天文稽曆數日月星辰風雷
氣色之異率其屬而占每季錄祥眚送門下
中書省紀于起居注歲終上送史館歲頒曆
于天下宋因梁曰司天監有大監少監判監
或以他官兼判又有同判之名以朝官充大
監及少監闕則置判監事二人以五官正以
上充掌察天文祥異鍾鼓刻漏稽定曆數供
諸壇祭祀神位版畫日元豐行改為太史局
有令有判局有同判局選五官正以上業優
考深者二人為判及同判掌占天文及風雲
氣候凡祥異之事日其所占以聞歲一頒曆
則造進御覽祭祀昏冠喪葬則擇所用日
政和因仍無所改其別局有天文院鍾鼓院

測驗渾儀刻漏所印曆所皆主占驗曆法

大元置司天臺有監少監判官教授等員所掌亦同

羣書要語

乃命羲和欽若昊天書敬授人時
○俶擾天紀○在璇璣玉衡以齊

七政○協時月正日並同上太史頒正朔于郡

國周禮掌邦之六典同上觀乎天文以察時變

易行夏之時語人代天工史分日月白氏六帖

視四時於玉律○掌日之官司天之吏○書雲

之史窺管之官○日月星辰乾象不忒○分至

啓閉歲功有成○二十四氣三百六旬○當同

文之朝思稟正朔○奉天史之職宜察天時並

同上分司簡日海錄碎事玉律調元璿璣授曆

思舉日官之職用知天道之玄宋廣平集差進

清臺之秩胡文恭制

詩句秦地立春傳太史漢宮題柱憶仙郎唐李

白寄司勳員外詩

古今事實

司天歷候

孟春命太史司天歷候日月星辰宿離不忒無

失經紀注歷推測也候占候也宿二十八宿也
離猶歷也七曜為經二十八宿為紀禮記月令

日官底日

日官居卿以底日禮也注位如卿而不在六卿
之數故曰居卿底致也平致也左傳

作渾天

漢張衡為太史官研窮陰陽妙盡璇璣之正作
渾天儀以漏水轉之於室內與天相應若符合

叙三辰

高陽命南正帝嚳亦叙三辰唐虞則羲和夏則

昆吾殷則巫咸周則史佚魯梓慎宋子韋齊甘
德鄭裨竈魏石內其巫咸甘石之說後代所宗

晉書

奏五官正

唐乾元二年知司天台韓頰奏敕創置五官正
職配五方上稽五緯

奏五星差

治平元年初上即位司天監奏崇天曆五星之
行及諸節氣有差詔權判司天監周琮七人同
造新曆

增六十甲子

至道二年司天冬官正楊文鎰上言請於新曆六十甲子外更增六十年事下有司判司天臺苗守信等議以為無所依據不可行用上曰支干相承雖止於六十年倘兩周甲子共成上壽之數使期頤之人得見所生之歲不亦善乎因詔有司新曆以一百二十甲子為限

獻九卷新曆

興國四年司天冬官正吳昭素父劉內直苗守信造新曆凡經紀為二卷晨昏為一卷日暉陰陽經一卷日出入刻為一卷晝夜刻分一卷五更中星一卷共九卷以獻上命衛尉少卿元象宗與明曆者同校定賜號乾元曆上自製序

造渾儀式

興國四年以司天監學士張思訓為渾儀丞先是思訓自言能為渾儀因造其式以獻上召南方上官於禁中如其式造之踰年而成機思精至詔置於文明殿東南隅漏室中因有是命

言渾儀制

至道元年十二月新鑄渾儀成先是司天秋官正韓顯符請言新鑄渾儀制度九事至鑄成於司天監築臺置之賜雜綵五十段

保章大夫

周禮有保章氏**秦漢**以來無其職後**周**春官府有保章上士中士至**隋**置曆博士又置保章正掌習曆**唐**長安四年改曆博士為保章正掌教曆生乾元元年加五官之名**宋**司天監有保章正慶曆詔十年一遷元豐改制掌曆法及測景分至表準五年一遷官**大元**有保章大夫

靈臺郎

後漢太史下別有靈臺丞掌靈臺掌候日月星辰。**魏**太史有靈臺丞主候望郎隋有天文博士**唐**初因之長安二年改為靈臺郎乾道元年改五官之名**宋**司天監有靈臺郎慶曆詔十年一遷 **大元**亦有靈臺郎之官

挈壺郎

周制夏官挈壺氏下士六人秋官司寤氏春官雞人凡三職咸掌其事自**漢**以後太史掌之**唐**長安四年始置挈壺正掌知刻漏孔壺為漏浮箭為刻以考中星昏

明之候乾元元年加五官之名 **宋**司天監有挈壺正元豐改太史局官惟挈壺正如故太史局官有五年一遷十年一遷試中而遷者惟挈壺正無遷者

大元有挈壺郎

羣書要語

挈壺氏凡軍事縣壺以序聚橐周禮挈壺正司辰 唐六典朝廷興居

無節號令不挈壺氏不能掌其職焉詩

古今文集

雜著

辨陳壽蜀不置史館論

唐子西

禮記人君言則左史書之動則右史書之周禮建官備矣獨不聞有所謂左右史者雖有太史然不以記注為職是時諸侯皆有史豈天子獨闕乎春秋之時卜田宅者占雲日者皆稱太史則太史殆陰陽家者流然書趙盾者書崔杼者亦稱太史則太史又似掌注記者蓋方是時學者適知天人而卜興廢者亦不純用著龜太史伯以祝融之功而推楚國之必興太史趙以虞

舜之德而占陳氏之未亡其論議證據有絕人者故陰陽注記得兼掌之漢司馬談父子爲太史今以論著爲已任而又掌天官則兼掌之効於茲可見魏晉之際始置著作郎自是太史之職分而爲二孔明之時未也按後主景耀元年史官奏景星見於是大赦改元而曰蜀不置史妄矣

文集

律詩

司天臺

李山甫

拂雲朱檻捧昭回靜對銅渾水鏡開太史只知

頻奏瑞蒼生無計可防災景公進德星曾退漢帝推誠日爲迴何事曠官全不語好天良月鎖高臺


新編古今事文類聚卷之三十

新集

密語坊

...

...



存
合
久

